

Kabikona

Givimayeta

Nufunufu nofe i iyaviya kafa viuḡu fasinei. I iyavita namaise fwayafwaya kana matatafu i vibutu, namaise namoḡa i vibutu eketa namaise fiyao Isineni i vibutu. Tofwa nuwesi nakanakasisi viginiwa nofe sinenei.

Nuyavana 1-11 i iyavita namaise fwayafwaya keta namoḡa Guyau i mikifufunisi. Nofe sifufunama ta ginaḡanaiya o Adama keta Ive, Keni keta Ebeni, Nowa keta ukowasobu, eketa Babeni numa manuwanoḡomatesi fasisiyai.

Nuyavana 12-50 i iyavita namaise fiyao Isineni i vibutu. Nofe sifufunama ta ginaḡanaiya Ebenaamu, natuna Aisake, waḡana Yakobo keta Yakobo natunatuna nasi 12 Isineni fasekwina nenei.

Gwadinama aitevana nufunufunama nofe i viginiwiya muka ita iyaveita kana wava, atu tosanamana si vitumaḡana vitana Mosese nofe sifusifufu i viginiwiya fiyao Isineni fasisiyai be yo sina tukuya namaise Guyau i gibokeisi yana namonamoḡa keta avana i fufuniya fasisiyai. Mosese nufunufu nofe i viginiwiya kamo 1500 keta 1230 B.C. kana kawasasai.

Guyau abama, fwayafwaya keta namoḡa i fufunisiya. (1:1—2:25)

Go'yonā keta kuvavana kasi kafa viuḡu. (3:1-24)

Adama nenei tu i niya Nowa nenei. (4:1—5:32)

Nowa keta ukowasobu. (6:1—10:32)

Babeni numa manuwanoḡomatesi. (11:1-9)

Semi nenei tu i niya Ebenamu nenei. (11:10-32)
 Ebenaamu, Aisake, keta Yakobo. (12:1—35:29)
 Isowa susukwana. (36:1-43)
 Yosefa keta sisitaina. (37:1—45:28)
 Fiyao Isineni Itifita nenei. (46:1—50:26)

Kifufuna Vauvau

¹ Kafa viūuwai Guyau abama keta fwayafwaya i fufunisiya. ² Eatu maiunuununa keta kawakakavina keta kumanovana kunukubana ogodibu i gikafufuya. Keta Guyau Kanununa etanei i kanukanuwedadaniya.

- ³ Keta Guyau i bwaduwa, “Mayesina, ku kikinomana,” keta mayesina i kikinomana.
- ⁴ Guyau mayesina i kitiya dewadewana eketa mayesina i nutakiya kumanovana nenei.
- ⁵ Keta mayesina i weniya *kuyadayada* atu kumanovana i weniya *nuwabuna*. Keta navinavi i kakaviya atu nuwabuni i kikinomana, na naki kuyadayada kafa viūgu.
- ⁶ Guyau i bwaduwa, “Baiyavana, ku kikinomana ukowa kasi kawasasai be ku nutakiya kabāga nuwesi nenesiyai.” ⁷ Eketa na naki maise i kikinomana. Guyau baiyavana i fufuniya ebe ina nutakiya ata kana ukowa keta tanowa kana ukowa.
- ⁸ Baiyavanana i weniya *abama*. Keta navinavi i kakaviya atu nuwabuni i kikinomana, na naki kuyadayada kana vinuwa.

- ⁹ Keta Guyau i bwaduwa, “Ukowa abama kanonovanei i kavivau kabāga tamokaḡa nenei atu fwayafwaya kasakasanina ku kikinomana.” Eketa na naki maise i kikinomana. ¹⁰ Kasakasanina i weniya fwayafwaya atu ukowa i kaviviya i weniya gibo. Keta Guyau i kitia naki dewadewana.
- ¹¹ Yota i bwaduwa, “Kisisiku tuninatunina fwayafwaya nenei i kawananaimi. Kai vivisisimi, kai na kavami be na susukwami.” Eketa na naki maise i kikinomana. ¹² Kisisiku tuninatunina fwayafwaya kasakasaninei si tafwa. Kai vivisisisi, kai na kavasi be na susukwasi si viuwa maise kiayonisi. Keta Guyau i kitia naki dewadewana.
- ¹³ Keta navinavi i kakaviya atu nuwabuni i kikinomana, kuyadayada kana vitonu.
- ¹⁴ Keta Guyau i bwaduwa, “Kimayeta, kawasasakaoḡowai kwa kikinomana be kwa nutakai kuyadayada nuwabuna nenei be kwana vikiyakiyaya tutuya, kuyadayada, keta manamana. ¹⁵ Kwana tafa kawasasakaoḡowai be fwayafwaya mayesina kwana veniya.” Eketa na naki maise i kikinomana. ¹⁶ Guyau kimayeta nuwesi nakanakasisi i fufunisiya, tafana nakasina kuyadayada ina visimeiya atu tafana kabegona nuwabuna ina visimeiya. Keta yota kinavinavi i fufunisiya. ¹⁷ Guyau kimayeta kawasasakaoḡowai i tenisiya be fwayafwaya sina tafiya, ¹⁸ be yota sina visimeisiya kuyadayada keta nuwabuna be yota sina nutakiya mayesina kumanovana

nenei. Keta Guyau i kitiya naki dewadewana.

19 Keta navinavi i kakaviya atu nuwabuni i kikinomana, kuyadayada kana vinufunina.

20 Guyau i bwaduwa, “Ukowa, ku maǵa gevageva tunisitunisi na yawasisi yota maise manuwa kawasasakaogowai.” **21** Guyau i fufunisiya gibo kana kabikeya be iba tamokatamokaǵa ukowa sinenei yawayawasisi si savisavivina tututausi kasi kikitana maise, yota manuwa tamokatamokaǵa tauna kana kikitana maise. Keta Guyau i kitiya naki dewadewana. **22** I sawanuwagabubuwisiya keta i iyavisiya i bwaduwa, “Gevageva, kwana vinatunasiwasıwaǵa keta kwana yagwana be gibo kwana vimaiya. Manuwa, kwana vinatunafuwaǵa keta kwana yagwana fwayafwaya etanei.”

23 Keta navinavi i kakaviya atu nuwabuni i kikinomana, kuyadayada kana vi5.

24 Guyau i bwaduwa, “Fwayafwaya, yomuyomu tamokatamokaǵa ku gikikinomaneisi nimwauwai be kidagimai, be yota tooyaǵayaǵaǵa tamokatamokaǵa, tauna kana kikitana maise.” Eketa na naki maise i kikinomana. **25** Eketa Guyau i fufunisiya yomuyomu nimwauwai be kidagimai, be yota tooyaǵayaǵaǵa tamokatamokaǵa, tauna kana kikitana maise. Keta Guyau i kitiya naki dewadewana.

26 Keta Guyau i bwaduwa, “Namoga

tana fufuniya kata kitakita maise ebe tasike kita maise. Be tasike nimasiyai tana tenisiya gibo kana iyana keta manuwa kawasasakaōgowai, yomuyomu fwayafwaya kana matatafu nenei, yota tooyağayağaga fwayafwaya nenei si savisavivina.”

27 Eketa Guyau namoḡa i fufunisiya tanake kana kitakita maise,
 Guyau kana kitakita maise i fufunisiya namoḡa,
 namoḡa keta gumayogu i fufunisiya.

28 Guyau i sawanuwagabubuwisiya keta i iyavisiya i bwaduwa, “Kwana vinatunasiwasıwaḡa keta kwana yagwana, be fwayafwaya kwana vimaiya keta kwana visimeisiya. Gibo kana iyana yota manuwa kawasasakaōgowai be yomuyomu matatafuna fwayafwayai si savisavivina, kwana visimeisiya.”

29 Guyau i bwaduwa, “Iba matatafuna fwayafwayai maise kai vivisisi keta kai viviuwasi, a venimiya tasike kami kabwaga.
30 Keta yomuyomu-wanawanaki yota manuwa be tooyağayağaga fwayafwaya etanei na yawasisi, a venisiya kisaya o kabwaga fasinei.” Eketa na naki maise i kikinomana.

31 Guyau iba matatafuna i fufunisiya, i kitiya naki dewabauna.

Keta navinavi i kakaviya atu nuwabuni i kikinomana, kuyadayada kana vi6.

2*Kuyadayada Kana Vi7 Nenei Guyau I Viyawasiya*

¹ Abama, fwayafwaya keta iba matatafusi kasi kikifufuna naki i kakaviya. ² Keta Guyau yana kifufuna i nusafuya, eketa kuyadayada kana vi7 nenei i vidawana eketa i viyawasiya. ³ Eketa kuyadayada kana vi7 Guyau i sawanuwagabubuwiya keta i tenesiniya, uguna kuyadayadanama nenei o i viyawasiya yana kikifufuna kana bunanige matatafuna nenesiyai.

⁴ Eketa namaise Guyau abama keta fwayafwaya i fufunisiya, naki maisemoka sifusifufuna.

Yave Namōga I Fufunisiya

⁷ Keta Yave Guyau fwayafwaya kafusisimina nenei namōga i gikamakamiya. Keta i kawasiveiya yawasina namōga niunei keta namōga i yawasa.

⁸ Keta Yave Guyau baguna i baguniya Ideni nenei gagasa kuweyaina keta namōganama i gikamakamiya nokomai i teniya. ⁹ I fufunisiya kai dewabausi nokomai si tafwa keta si sakuna uwasi dewadewasi. Baguna sinefounei kai nuwesi si misiniya. Kai tamokāga i misiniya o yawasi kana kai eatu tamo o dewadewana keta goyona kasi kafa sanamana kana kai.

¹⁵ Keta Yave Guyau namōga baguna Ideni sinenei i teniya be ina saviviniya keta yota ina kitavikaviniya. ¹⁶ Yave Guyau namōga i iyaviya i bwaduwa, “Ka nufota avi kai uwana kuna kaniya

baguna sinenei. ¹⁷ Atu namai dewadewana keta goyona kasi kafa sanamana kana kai muka nenei kuna ka. Tovanama kuna kaniya, kuna mateya.”

¹⁸ Yave Guyau tauna nenei i bwaduwa, “Namoǵa kana kisina i fakwafakwa atu muka dewadewana. Unana ana fufuniya be ina ovivitiya.” ¹⁹ Keta fwayafwaya i viya keta yomuyomu matatafusi be manuwa matatafusi i gikamakamisiya. Keta i nemiisiya namoǵa nenei be ita kitiya namoǵa namaise kasi wava ita kavenena, keta namaise kasi wava i viweneya naki maise kasi wava. ²⁰ Namoǵa, manuwa kawasasakaoǵowai be yota yomuyomu nimwauwai eketa kidagimai matatafusi kasi wava i kavenena, eatu muka tamo nama ita nufotai Adama* kana toovivita.

²¹ Eketa Yave Guyau namoǵa i visanafuwiya keta i banumatemateya. Keta yawane i banubanuwa nenei, Guyau namoǵa ninivatavatanina i viya atu viyo nenei kawakivina i tenefotiya. ²² Yave Guyau gumayogu i gikamakamiya namoǵa ninivatavatanina nenei eketa i nemiiya namoǵa nenei.

²³ Namoǵa i bwaduwa,

“Nofe tanake, seǵa o iyau seǵaku
keta viyo o iyau viyoku.

Nofe tanake Namoǵa sinenei i viya,
na fasinei ana weniya Gumayogu.”†

* **2:20** Ibeniu fonasiyai, Adama kana givina maise namoǵa.

† **2:23** Ibeniu fonasiyai, gumayogu kana nowanowana maise namoǵa.

24 Na fasinei namōga amana keta ayona ina teweisiya eatu kawana nukusi sina saviya tamo nenei, eketa kasi nuwa sina vitamokāga.

25 Namōga keta kawana nukusi gonegonesi atu muka sita sinemumu.

3

Namaise Go'yona I Viūgu

1 Yomuyomu kidagimai Yave Guyau i fufunisiya sinesiyai mwata tanake tovikanononoonaona. Mwata gumayogu i nutonidadaniya i bwaduwa, “Venemokena Guyau i iyavimiya muka uwa kwana ka kaisima baguna sinenei?”

2 Gumayogu i bwaduviyewa i bwaduwa, “Muka, kima kama nufota kaisima uwasi baguna sinenei kana kawa, **3** atu kai tamokāga baguna sinefounei i misimisiniya, Guyau i iyavikiya i bwaduwa, ‘Muka kainama uwana kwana kaniya keta muka kwana ginuvanuvi. Taki kwana saviviniya na naki kwana mateya.’”

4 Mwata i iyaviya i bwaduwa, “Muka venemokena. Muka kwana mate. **5** Kuyadayadanama nenei kwana kaniya, matami sina kabwasasa keta kwami vitana Guyau maise kwana sanamaniya dewadewana keta goyona. Guyau i sanamaniya keta na fasinei i sawatanimiya muka kwana kaniya.”

6 Gumayogu i kitiya kai dewadewana kana nufota kabwaga keta kana fusa dewadewana. Nuwanuwana ina kaniya be ina sanamana, na nenei aviyesi uwana i visiya keta i kaniya, atu

tunina kawana i veniya keta i kaniya. ⁷ Tovanama nenei matasi si kabwasasa keta si sanamaniya tasike gonegonesi na nenei nugweda dadana si yuna keta si suyakafukafuwa si dawanafota.

⁸ Tovanama navinavi kabaǵa i tunuwa, si nowaniya Yave Guyau baguna nenei i niniya. Namoǵa keta kawana si makaviuna kai nenesiyai be Yave Guyau muka ina kitaisi. ⁹ Atu Yave Guyau namoǵa nenei i bwauwa i bwaduwa, “Kwaǵa namai?”

¹⁰ Namoǵa i bwaduviyewa i bwaduwa, “A nowaniwa baguna nenei. Iyau gonegoneku na fasinei a matuta keta a makaviuna.”

¹¹ Yave Guyau i nutoninuvanuva i bwaduwa, “Aitevana i iyaveu kwaǵa gonegoneu? Kainama a iyaviwa muka kuna kaniya, naki ku kaniya?”

¹² Namoǵa i bwaduviyewa i bwaduwa, “Gumayogu-nama ku venikuwa, tanake i venikuwa kai uwana keta a kaniya.”

¹³ Yave Guyau gumayogu i nutoninuvanuviya i bwaduwa, “Ei, ava ku fufuniya?”

Gumayogu i bwaduviyewa i bwaduwa, “Mwata i nonukuwa keta a kaniya.”

¹⁴ Yave Guyau mwata i iyaviya i bwaduwa,
“Na ava ku fufuniya fasinei, ana vimatadawaniwa
yomuyomu nimwauwai be kidagimai
matatafusi sinesiyai.

Kwaǵa kuna oyaǵaǵa manawaweu
keta kafusisima o ka kabwaga yawasiu kana
matatafu nenei.

¹⁵ Ana visanafuwiwa kwaǵa keta gumayogu

kwana vikaniyabina,
 keta kwaǵa susukwau keta gumayogu susuk-
 wana sina vikaniyabina.
 Tanake debabouǵu ina nufuwaiya
 atu kwaǵa kaeketuketuna kuna kanavasiya.”

16 Gumayogu nenei i bwaduwa,
 “Ana visanafuwiwa dauna kuna nisaiya tovanama
 kuna visifuǵa nenei,
 nofe tovanama keta ina niya kuvavana
 nakasina vinatuna nenei.
 Nuwanuwau be kawau nukusi,*
 atu tanake kwaǵa ina vanetaniwa.”

17 Adama nenei i bwaduwa,
 “Kawau fonana ku nowaniya fasinei
 keta kainama a iyaviwa muka kwana kaniya
 atu kwa kaniya,
 keta kwaǵa neneweу fwayafwaya a ituituya.

Bunanige kuvakuvavanina kuna saviviniya
 yo ka kabwaga kuna nisaiya yawasiu kana
 matatafu nenei.
18 Fwayafwaya ina okikinomaniya kisisiku kikik-
 wanekwanesi keta sakasakanunusi,
 keta noko bwibwiyagunama kabwagina
 nenei kuna kawa.

19 Kuna fwasimowa bunanige nenei yo
 ka kabwaga kuna viya
 kana nivaniva kuna makaviniwa
 fwayafwaya nenei.

* **3:16** Yota kana givina nuwanuwau be kawau kuna visimeiya.

3:17 Ibeniu 6:8

Kafusisima a viya fwayafwaya nenei keta
a gikamakamiwa,
keta kwāga kuna vikafusisima-savaviniwa.”

20 Namōga i sanamaniya kawana ina viayowa namōga fakwafakwasi matatafusi nenesiyai, na fasinei i weniya Ive.[†] **21** Yave Guyau yomuyomu kwafinisi i yuna keta nuya i fufunisiya Adama keta kawana fasisiyai keta i vikotonisiya.

Yave Guyau I Vikikinomanisiya Adama Keta Ive Baguna Nenei

22 Yave Guyau tauna nenei i bwaduwa, “Namōga i nemiya kita maise keta i sanamaniya dewadewana keta goyon. Muka nimana ina tunei kai yawasi i kakavenena, uwana ina vai ina kaniya be muka ina fakwavāgata.” **23** Keta Yave Guyau i vikikinomanisiya baguna Ideni nenei, be namai fwayafwayanama nenei i gikamakamiya Adama ina bunanigeiya. **24** I vikikinomanisiya muninei keta i iyavisiya kikifufuna kasi wava senabimu[‡] sina misiniya gagasa keweyaina baguna Ideni nenei. Yota i teniya feto nununuina keta nuganavivineinana be tasike sina viketofotiya ke'ta i niniya yawasivāgata kana kai nenei.

4

Keni Keta Ebeni

1 Adama kawana Ive nukusi si mataveya keta Ive si visifuga eketa si vinatuna. Si bwaduwa, “Yave yana

[†] **3:20** Ibeniu fonasiyai, Ive kana givina maise fakwafakwasi.

3:22 Kenokita 22:14 [‡] **3:24** Senabimu o abama kana kikifufuna na gefesi.

ovivita nenei natuki ka nisaiya.” Na uḡuna si weniya Kени.* ² Muniyai yota taina namoḡa si vinatuniya keta si weniya Ebeni.

Tovanama si nakata, Ebeni sifi kasi tokitavikavina atu Kени i vitobaguna. ³ Tova tamokaḡa Kени yana bagubaguna kabwagina i nemiisiya keta i vibwanaoseiiya Yave nenei, ⁴ atu Ebeni yana sifi si mikivinatuna, tanaina dewabauna i nemiiya eketa i vibwanaoseiiya Yave nenei. Yave i katuvisiya Ebeni keta yota yana bwanaose, ⁵ atu Kени keta yana bwanaose muka ita katuvaisi. Kени i kayokuḡa keta kana nawenawe i dawanavinavina nuwagoyo.

⁶ Keta Yave Kени i iyaviya i bwaduwa, “Ava uḡuna ku nuwagoyo yo tafakaiu i kanawenonoi? ⁷ Taki fufuna dawaniniina kuta saviviniya nao ata katuviwa. Atu fufuna goyona ku saviviniya fasinei, matau ina kakanakasiya! Go'yon a niniuweu i kenokenovikifafa be ina ketosesena yomuyomu-wanawanaki maise. Go'yon a nuwanuwana nakasina be ina visimeiwa atu kwaḡa kuna vanetaniya.”

⁸ Keta muninei Kени taina Ebeni i iyaviya i bwaduwa, “Ta nai wanakiyai ta nidadana.” Tovanama nokomai, Kени i misiniya keta taina Ebeni i nuvimiatiya.

⁹ Tovanama ibanama i kikinomana muninei, Yave i nutoninuvenuvia i bwaduwa, “Taiu Ebeni namai?”

* **4:1** Ibeniu fonasiyai, Kени kana nowanowana maise Ibeniu fonasi kana givina kifufuna o yuna. **4:4** Ibeniu 11:4 **4:8** Madiu 23:35, Nuke 11:51, 1 Yoni 3:12

Keni i bwaduviyewa Yave nenei i bwaduwa, “Muka ata sanamanei tanake namai. Namaise, o iyau unaku kana tokitavikavina?”

¹⁰ Atu Yave i iyaviya i bwaduwa, “Ava uguna yo fufuna goyomokena ku savivinei? Taiu ufaufana kayona fwayafwayai i bwedibwedi-kikinomana nenekuwai. ¹¹ Keta nofe tova ana ituwa. Unau ku nuvimatiya keta ufaufana fwayafwaya ku viyumiya, na fasinei muka fwayafwayanama kuna savivinei. ¹² Nofe tova keta tova si nenemiya, tovanama fwayafwaya kuna saviviniya, muka kabwaga ina veneu. Muka tamo ya kafa fakwa keta kuna vitovenukaokaoğowa fwayafwayai.”

¹³ Keni Yave i iyaviya i bwaduwa, “Kaku vimatadawana i nakatamoka, muka kaku fata. ¹⁴ Kimoki kwağā ku kwavikwavinikuwa fwayafwaya nofe nenei keta yota neneieu. Ana vitovenukaokaoğowa fwayafwaya etanei keta aitevana ina nisaikuwa, ina nuvimatikuwa.”

¹⁵ Atu Yave i nufata i bwaduwa, “Muka. Taki tamo aitevana ina nuvimatiwa, yawasi 7 ana nuyaunisiya kwabu fasinei.” Na fasinei Yave kiyakiyaya i teniya Keni nenei be aitevana ina venusaiya, muka ina nuvimatei.

²⁵ Keta Adama kawana nukusi yota si mataveya keta namoğā i tufuwa. Ive si bwaduwa, “Keni i nuvimatiya Ebeni fasinei, Guyau gwadimona-mona yota i venikiya be Ebeni ina noseyaniya.” Na fasinei si weniya Seta.†

^{4:10} Ibeniu 12:24 † ^{4:25} Ibeniu fonasiyai, Seta kana givina maise kavenena.

26 Seta yota i vinatuna keta i weniya Inosi. Inosi yana tovai, namoḡa si vibutuwa si kodukoduwa Yave nenei.

6

Namoḡa Yasi Fufunagoyo

5 Yave i kitiya namoḡa matatafusi yasi fufunagoyo i nakatamoka fwayafwayai, keta iba matatafunu si nuwenuwiya keta si vivinuwadadanisiya o goyona venemokena tova kana matatafu. **6** Yave tauna i vinuwakuvaniya namoḡa i fufunisiya keta i tenisiya fwayafwayai, na fasinei nuwatana i dauna. **7** Eketa Yave i bwaduwa, “Namoḡa matatafusi ana nyaunisiya fwayafwaya nofe etanei. A vinuwakuvanikuwa uḡuna naki a fufunisiya. Na fasinei namoḡa kasi matatafu keta yomuyomu nakanakasisi matatafusi be musumususi si ooyaḡayaḡaḡa fwayafwaya etanei, yota manuwa matatafusi kawasasakaoḡowai ana nyaunisiya.”

8 Atu Yave o Nowaḡa i sebobowiya.

Nowa Sifusifufuna

9-10 Nowa keta ugunina sifusifufusi nofemaise.

Nowa natunatuna nasi tonu namoḡa kasi wava Semi, Ami, keta Yafeta. Nowa o namoḡa dewadewana, tanake kana kisimokena fwayafwaya etanei eyaeyana tovasima nenesiyai. Nowa Guyau i viunaniya.

11 Atu Guyau i kitija fwayafwaya matatafunu i goyowa eketa vikamunumunuwa i katanenēga. **12** Guyau i toneiya fwayafwaya keta i kitija naki

i goyomoka uḡuna namoḡa matatafusi ke'ta goyona nenei si fakwafakwa.

13 Keta Guyau Nowa i iyaviya i bwaduwa, "A vinuwadadana be namoḡa matatafusi ana nuyaunisiya uḡuna vikamunumunuwa fwayafwaya i vimaiya. Fwayafwaya kana matatafu etanei iba matatafunu ana nuyauniya.

14 Na fasinei waka kitagoyona kuna yoniya tauḡu fasiweu. Kai fakinisi nenesiyai kuna yoniya. Sisiuna kuna kitutunaonota waka sinenei. Sinena keta kwauna kuna nutamaniya kibasi nenei.

15 Kuna yoniya nofemaise. Kana fwafwa kana niva 140 mita, kana nafanafa kana niva 22 mita, keta yana vivivane kana niva 14 mita.

16 Kudukudu kuna teweiya keta kawasasa kana niva 50 senitimita kuna teniya kudukudu keta fita kasi kawasasai ina fanakwaniūḡa. Waka niniunei kawa kuna fufuniya. Baionota tonusi kuna yonisiya — etana, sinefouna, keta sifuna.

17 Ku vaneneḡa! Ukowasobu ana teweiya keta fwayafwaya kana matatafu ina unakafufuya be iba matatafunu na yawasina fwayafwaya etanei ina nuvimatisiya. **18** Atu kaku dedeni a teneteniya neneweу. Kwaḡa, kawau, keta natunatuu nakakawasi kwana kanasuna waka sinenei. **19-20** Yomuyomu tunisitunisi nakakawasi kuna totoisiya nukusi. Tamokaḡa namoḡa keta tamokaḡa gumayogu, manuwa tunisitunisi nenesiyai kuna nemiisiya keta yomuyomu nakanakasisi be musumususi si ooyaḡayaḡaḡa, kuna kitavikavinisiya ebe yawayawasisi sina fakwafakwa. **21** Yota kabwaga tuninatunina

yagwanina kuna totoiya, uguniu nukusi fasimiyai keta yota yomuyomu fasisiyai.”

22 Eketa Nowa iba matatafunu i saviviniya Guyau i iyaviya maise.

7

Ukowasobu I vibutuwa

1 Yave Nowa i iyaviya i bwaduwa, “Kwaṅga ka kisimokeu fwayafwaya nofe nenei ya fufuna dawaniniina. Na uḡuna kwaṅga keta uguniu kwa kanasuna wakai. **2** Nama yomuyomusima eyaeyasi, kuna visiya namoḡa 7 keta kakawasi 7. Atu yomuyomusima muka eyaeyasi, nao tamokaṅga namoḡa keta kawana. **3** Keta yota manuwa kuna visiya 7 keta yota kakawasi 7. Nofe kuna saviviniya be yomuyomu keta manuwa tunisitunisi be yota sina geyana fwayafwayai. **4** Kuyadayada 7 muninei, bwabwau ana teweiya keta ina sigwana fwayafwayai kana nivaniva kuyadayada 40 keta nuwabuna 40, ebe kikifufuna matatafunu a fufuniya na yawasina fwayafwayai ana nuyaunisiya.”

5 Keta Nowa iba matatafunu i saviviniya avana Yave i iyaviya maise.

17 Ukowasobu i unauna kana nivaniva kuyadayada 40 eketa waka i nufutefuteiya fwayafwaya etanei.

23 Keta iba matatafunu na yawasina fwayafwaya etanei Yave i nuyaunisiya ukowasobuwai. Namoḡa matatafusi be

yomuyomu nakanakasisi be musumususi si ooyağayağaga, yota manuwa nukusi, si mateya. Atu naki aviyaonana waka sinenei Nowa nukusi, nao si fakwa na yawasisi.

8

Ukowasobu muninei, ukowa i nukasana keta fwayafwaya i kokoniya.

Ukowasobu Kana Kafa Nusafi

15 Eketa Guyau Nowa i nusifufuwiya i bwaduwa,
 16 “Kwağa na kawau keta yota natunatuu na kakawasi nukusi waka kwana teweiya atu kwana sobuwa menanai. 17 Kikifufuna matatafusi yawayawasisi kuna ovisiya maise manuwa, yomuyomu keta yota matatafusi tooyağayağaga fwayafwaya nenei, be sina vinatunasiwasıwağga keta sina yagwana be yo sina geyana fwayafwaya kana matatafu etanei.”

18 Keta Nowa na kawana, keta natunatuna na kakawasi, waka si teweiya atu si kikinomana menanai. 19 Matatafusi yomuyomu, manuwa keta tooyağayağaga wakai si kikinomana kasi sabus-abuwai.

20 Keta Nowa didiğä i didiyya kafa vibwanaose Yave nenei eketa yomuyomu be manuwa eyaeyasiğä nenesiyai, tunina i visiya keta i gumatatafusiya didiğä etanei bwanaose fasinei.

21 Tovanama bwanaose madina i sebobowiya, Yave tauna nuwasinenei i bwaduwa, “Muka yota tova munina namoğä yasi fufuna fasinei fwayafwaya ana ituya. Naki a sanamaniyanamoğä musumususiyai keta si nakanakata, katekatesiyai goyona si nuwinuwiisiya atu mukamokena yota

ana nuyauneisi iba tamokatamokaǵa na yawasina
maise kimoki a fufuniya.

²² Tovasima fwayafwaya ina fakwafakwa,
baguna be kiyana,
yaseǵana be kwadudu,
gagasa be yavanata,
kuyadayada be nuwabuna
sina fakwafakwa, muka ina kakaveisi.”

9

Guyau Kana Dedeni Nowa Nenei

¹ Keta Guyau Nowa na natunatuna
i sawanuwagabubuwiya i iyavisiya i bwaduwa,
“Kwana vinatunasiwiwaǵa keta kwana yagwana
be kwana geyana fwayafwaya kana matatafu
nenei. ² Yomuyomu matatafusi nakanakasisi
be musumususi si ooyaǵayaǵaǵa fwayafwayai be
manuwa keta iyana sina oomatumatutimiya eketa
kwami kwana visimeisiya. ³ Iba tamokatamokaǵa
na yawasina o kami kabwaga. Naki maise
manatuwaina a venimiya kai viviuwasi keta
kisaya o kafa kaka. Nofe tova a venevenimiya
iba matatafuna kami kabwaga.

⁴ Atu muka viyo na ufaufana kwana kaniya
uǵuna yawasi ufaufa sinenei. ⁵⁻⁶ Namoǵa
a fufunisiya tauku kaku kitakita maise
eketa avi namoǵa o avi yomuyomu tamo
namoǵa ina nuvimatiya, tanake namoǵanama
o yomuyomunama ana vimatadawaniya. Taki
tamo yomuyomu namoǵa ina nuvimatiya,

yomuyomunama sina nuvimatiya. Maise yota taki aitevana namoḡa tamo ina nuvimatiya, namoḡanama sina nuvimatiya.

⁷ Atu kwana vinatunasiwaswaḡa keta kwana yagwana ebe fwayafwaya kwana vimaiya.”

⁸ Keta Guyau Nowa na natunatuna i iyavisiya i bwaduwa, ⁹ “Kwa vaneneḡa! Nofe tova yaku dedeni ana fufuniya kwami nenemiyai eketa yota susukwami yawane si nenemiyai nenesiyai, ¹⁰ yota kikifufuna matatafusi yawayawasisi maise manuwa be yomuyomumenana yota yomuyomu-wanawanaki wakai nukusi, matatafumi fwayafwayai nenemiyai. ¹¹ Nofe bwadusima nenesiyai kaku dedeni a oovikavikaviniya kwami nenemiyai. Mukamokena yota ana visimeyei ukowasobu be kikifufuna yawayawasisi ina nuvimateisi yota fwayafwaya ina nuyaunei.”

¹² Guyau i iyavisiya i bwaduwa, “Dedeni kana kiyakiyaya a fufuniya Iyau, kwami keta kikifufuna yawayawasisi nukusi kata kawasasai, yota tova i nenemiyai sabusima fasisiyai. ¹³ Yaku tanikubo ana teniya busibusi sinenei be ina vikiyakiyaya yaku dedeni Iyau keta fwayafwaya kana matatafu kata kawasasai. ¹⁴ Tovanama kawasasakaōgo ana gikafufuya busibusi nenei keta tanikubo ina kikinomana, ¹⁵ ana tukunakasiya yaku dedeni, Iyau keta kwami be kikifufuna matatafusi na yawasisi kata kawasasai be mukamokena yota ukowasobu yawasi matatafuna ina nuyauneisi.”

11

Babeni Numa Manuwanoḡomatesi

¹ Nauna o namoḡa matatafusi fwayafwaya etanei, fona tamokaḡamoka kana kituwai si nusifufuwa.

² Noko tovanama nenei, namoḡa si toḡavenudadana gagasa kuweyaina. Fafani kana wava Sina nenei, fwayafwaya katuyaveyavenina nakasina si nisaiya keta nokomai si fakwa.

³ Keta tututausi nenesiyai si nusifufuwa si bwaduwa, “Kwa nemai, taga tana viya be tana yafofwiṣiya keta tana nukwafusiya be sima fakina.” Si saviviniya keta taga kikiyafofosi si kiyoniiya keta kibasi nenei si gimaimaiyi. ⁴ Eketa si nusifufuwa si bwaduwa, “Kwa nemai, be menana nakasina tana vikanasiya tututauta fasitiyai, numa tana yoniya manuwanoḡomatesi, be ina vaneya abama ina oviya. Nofemaise tana fufuniya be tututauta kata wava tana givinakasiya ebe muka tana kafiyauyauna fwayafwaya kana matatafu nenei.”

⁵ Si kikiyona atu Yave i sobunemiya be ina kitiya menana nakasina yota numa manuwanoḡomatesi namoḡa si yonayoniya. ⁶ Keta Yave i bwaduwa, “Nofe tova tasike naki yoko tamokaḡa, fona tamokaḡa nenei si nunusifufuwa. Nofe tova si vibutuwa keta sina savivina maise ebe tova munina aviyavana tamo si nuwenuwiya, naki kasi nufotamoka be sina saviviniya. ⁷ Kwa nemai, tana sobuwa be fonasi tana wenuya be muka tututausi sina sanamanei unaunasi yasi bwadu.”

⁸⁻⁹ Eketa Yave i nuyauyaunisiya fwayafwaya kana matatafu nenei, eketa menana nakasina kana vikanata si vidawana. Nokomai Yave fwayafwaya

kana matatafu namōga fonasi i wenuya. Na fasinei menana noko si weniya Babeni.*

Tova manatuwaina i kakavisiya muninei, Nowa natuna Semi ugunina nenei Ebenamu i tuwuwa.

12

Yave Ebenamu I Bwauwiya

¹ Yave Ebenamu i iyaviya i bwaduwa, “Ya menana keta ya sabu yota ya fasekwa kuna teweisiya, atu fwayafwayanama ana visawaveniwa nenei kuna niya.

² Ka sabu nakasina ana veniwa keta tasike nenesiyai kunuma nakasina ina kikinomana.

Iyau ana sawanuwagabubuwiwa.

Ka wava yota ana givinakasiya be namōga matatafusi sina sanamaniya keta sina vifotuwiwa.

Kwāga neneweu, namōga kasi sawanuwagabubu sina nisaiya.

³ Tovanama namōga sina sawanuwagabubuwiwa, Iyau yota ana sawanuwagabubuwiya.

Atu taki namōga sina ituwa, Iyau yota ana itusiya.

Kwāga neneweu, namōga matatafusi fwayafwaya etanei ana sawanuwagabubuwiya.”

⁴⁻⁵ Na tovanama nenei Ebenamu kana manama 75. Keta i saviviniya avana Yave i iyaviya maise. Anani i teweiya na kawana Sanai keta auna Nota nukusi. Tovanama Anani si fakwa nenei, Ebenamu yana nogonogo keta yana yomuyomu

* **11:8-9** Ibeniu fonasiyai, Babeni kana givina maise weno. **12:1**
Bunanige 7:2,3, Ibeniu 11:8 **12:3** Ganetiya 3:8

keta yota yana tobunani ge i nisa āga. Nofe ibasima nukusi i visiya keta Kenani kuweyaina si niya.

Tovanama si kikinomana Kenani kana baionota nenei,⁶ Ebenamu yana sabu nukusi noko fwayafwayanama si venuonosiya keta si niya menana nakasina kana wava Sekemu niniunei. Nokomai kai nakasina niniunei si vikaba āga menana Mone nenei. Tovanama nenei Kenani fiyaosi yawane si fakwafakwa noko fwayafwayanama nenei.⁷ Nokomai Yave tauna i tenekikinomaniya Ebenamu nenei eketa i iyaviya i bwaduwa, “Nofe Kenani fwayafwayana susukwau ana venisiya.” Eketa Ebenamu, kafa vibwanaose Yave nenei kana didi āga i didiyya. Namai Yave tauna i visawaveniya nenei, i vimisiniyya.

Fafani Kenani sinenei, Ebenamu keta yana sabu nukusi si to āgavenudadana. Muka numa sita kiyona atu vada si kifufuna keta nenesiyai si fakwa. Tovanama sina niya mani kaba āgai be sina vikaba āga, yasi vada si kikikuwa eketa yomuyomu kwausiyai si unaunaniina.

Muka nugi sita bagubaguna atu yomuyomu āga si kikitavikavina. Tunina yasi yomuyomu si kakamokisiya atu tunina si vivitamanina mani namo āga nukusi witi fasinei. Eketa witinama o si fuwafuwaiya keta maneka si kakaguwana.

13

Ebenamu Keta Nota Yasi To āgasisina

⁵ Na tovanama nenei, Nota keta Ebenamu yawane tamo nenei si ninidadana. Nota yota yana yomuyomu yagwanisi keta yota

namōga yagwanisi nukusi yana vada nenesiyai si fakwafakwa. ⁶ Ebenamu keta Nota yasi yomuyomu si yagwanamataiya keta yasi kafa ka kana kabāga o muka kasi fata. Na fasinei nasi nuwa muka kasi fata be tamokāga fwayafwayanama nenei sina fakwa.

⁸ Keta Ebenamu Nota i iyaviya i bwaduwa, “Ku vanenēga! Kita ugunita, na ūguna muka tana vikawabwadubwadu keta yota yata yomuyomu kasi tokitavikavina muka tututausi nenesiyai sina vivigwāga. ⁹ Na ūguna tana tōgasisinga be tana niya kabāga tuninatunina nenesiyai. Fwayafwaya noko nautiyai ku kitakitiya. Ku vinuwadadanei avi kabāga nuwanuwau maise o ku nai be nokomai ku fakwa. Taki kuna niya kukikikataita kuweyaina, nao iyau ana niya kukikimawata. Eatu taki kuna niya kukikimawata kuweyaina, nao iyau ana niya kukikikataita.”

¹⁰ Eketa Nota matana i tewetamaniya Yonidani ukowa kuweyaina keta i niya kana nivaniva Sowa menana nenei. Ukowa yagwanina yota fwayafwaya dewadewana i kitija vitana Yave yana baguna* maise yota fwayafwaya dewadewana vitana Itifita nenei maise. (Na tovanama nenei Sodoma keta Gomona o Yave yawane muka ita nuyauneisi.) ¹¹ Nota i vinuwadadaniyafafani Yonidani kana matatafu tauna fasinei eketa i niya gagasa kuweyaina. Nofe ketaketanama nenei Nota keta Ebenamu si tōgasisinga. ¹² Ebenamu o Kenani fwayafwaya nenei i fakwa atu Nota o Yonidani kana kawanau

* **13:10** Baguna Ideni. (Kabikona 2:10)

nenei i fakwa Sodoma menana nakasina niniunei.
¹³ Sodoma namoisi yasi fufuna naki goyomataina. Fufuna goyomokesi Yave matanei si savivinisiya.

¹⁴ Ebenamu keta Nota yasi toğasisina muninei, Yave Ebenamu i iyaviya i bwaduwa, “Ku kitadadana-fanakwaniūga-dewadewafafani tamokatamokaōga nenesiyai — bomatu, gagasa, nanakoya keta yavanata kuweyaisi — namai matau ina niya kana nivaniva maise. ¹⁵ Fwayafwayanama matatafunaku kitakitiya, kwaōga keta susukwau nukusi ana venimiya. Noko yami fwayafwayavaōgata. ¹⁶ Ka sabu ana veniwa o muka tamo aitevana kana fata be ina ginaōganāgaisi. Naki maisemoka genasa fwayafwayai muka tamo aitevana kana nufota be ka sabu ina ginaōganāgaisi. ¹⁷ Nofefwayafwayanama matatafunaa veneveniwa, na fasinei ku nai ku vadadaniya be ku kitadewadewai.”

¹⁸ Keta Ebenamu i noōkawawa keta Mamene kana kai nakanakasisi niniusiyai i vikabaōga Ebiononi menana nakasina nenei. Nokomai didiōga i didiyya Yave nenei.

14

Tovanama Nota Sodoma i fakwafakwa nenei, tu-fomu nasi nufunina yasi tonuaviya nukusi si nemiya keta Sodoma be menana nakanakasisi na fafanama nenei si kanasunisiya keta Sodoma tonuaviya si vatanisiya.

Ebenamu Nota I Gifafafaniya

¹¹⁻¹² Sodoma keta Gomona fiyaosi kasi kaniyabina si nemiya keta yasi nogonogo be kasi kabwaga

matatafunu si yuna. Ebenamu auna Nota Sodoma i fakwafakwa, tanake tauna keta yana nogonogo matatafunu yota si visiya keta si niisiya.

¹³ Tamokaġa namoġa vikamunumunuwa nenei i dibwana keta i nemiya Ebenamu biga i veniya. Tovanama nenei Ebenamu tene Ibeniu i fakwafakwa tene Amonai kana wava Mamene yana kai nakanakasisi niniusiyai. Mamene na sisitaina, Esikoni keta Ane, si vinowaniya Ebenamu vitana nukusi sina vikaovivita vikamunumunuwa nenesiyai.

¹⁴ Ebenamu yana tonuaviya kasi yagwana 318 yana kabaġai si tuwuwa. Tovanama i nowaniya nifanifaisi auna si viya, yana namonamoġa matatafusi i wenevakukusisiya keta nifanifaisi si kwavinisiya kana nivaniva Dani menana nakasina nenei. ¹⁵ Tovanama i kumanovana, Ebenamu yana tonuaviya i vitukuwisiya yoko nenesiyai keta nifanifaisi si kanasunisiyafafani tuninatunina nenesiyai keta si vatanisiya. Nifanifaisi si dibwana eketa Ebenamu yana namonamoġa nukusi si omunitawisiya kana nivaniva Oba menana nakasina Damasiko bomatu kuweyaina. ¹⁶ Ibisma matatafunu nifanifaisi si gikumisiya, matatafunu i visiya. Yota Nota na yana nogonogo nukusi keta vivine be mani namoġa matatafusi nukusi i nemije-savavinisiya.

Menekisedeki Ebenamu I Sawanuwagabubuwiya

¹⁸ Menekisedeki i nemija keta Ebenamu i venufotefotiya. Tanake Sanema menana nakasina kana tufomu keta yota Guyau Etanemokenei yana tovibwanaose. Maneka keta waini i nemisiya keta

Ebenamu i veniya. ¹⁹ Menekisedeki Ebenamu i sawanuwagabubuwiya i iyaviya i bwaduwa,

“Guyau Etanemokenei abama keta fwayafwaya
i fufunisiya,
iba dewadewasi fasiweu ita savivinisiya.
²⁰ Guyau Etanemokenei nifanifaiu nimaweu
i tenisiya,
na fasinei tana daviya.”

Eketa Ebenamu nogonogosima i visiya nifanifaina nenesiyai, dawana 10 i tenisiya keta dawanana nanei tamokaǵa Menekisedeki i veniya.

15

Yave I Bwadudabadaba Ebenamu Nenei

¹ Muniyai Yave Ebenamu kenokita nenei i iyaviya i bwaduwa,

“Ebenamu, muka kuna matuta.
Iyau ya veve,
Iyau fatau nakatamokena ana veniwa.”

²⁻³ Ebenamu i nufata i bwaduwa, “Yaku Tuveka Yave, iyau muka tamo natuku na uǵuna ya nuwagabubunama muka ina oviviteiku. Mu ka tamo natuku kuta veneiku. Keta taki ana mateya, Eniyesa tanake tene Damasiko kaku toovivita, yaku kaikaiwabu matatafunu ina viya.”

⁴ Atu Yave i bwadu-savaviniya i bwaduwa, “Mu ka noko namoǵanama ya kaikaiwabu ina vai. Naki kwaǵa taumokeu uyoweu, natuu ina tufuwa. Kuna mateya nenei, tanake ina vikaiuǵuniya.”

5 I oviya i kikinomaniya menanai eketa i iyaviya i bwaduwa, “Matau i vane kawasasakaogowai be yamasi kinavinavi ku ginañanaña-nuvanuvaisi, taki ka fata maise. Yawane susukwau maise kinavinavi. Muka tamo aitevana kana fata be ina ginañanañaaisi.”

6 Ebenamu i vitumañganiya Yave yana bwadunama, na fasinei Yave i sebobowiya eketa i bwaduwa tanake eyaeyana matanei.

12 Tova vanavana i sonusonuwa nenei, Ebenamu i kenomatemateya kana tovai, kumanovana kitagoyona be matuta i kabwanatauniya. **13** Keta Yave i iyaviya i bwaduwa, “Nofe kuna sanamanadewadewiya. Susukwau sina viyauyauna mani fwayafwayai. Tonifwayafwaya susukwau sina vikaetoisiya keta yota sina vitoagoyogoyowisiya manamana 400 sinenei. **14** Atu yawane tonifwayafwayasima yasi vitoagoyogoyo fasinei ana vimatadawanisiya eatu susukwau sina vikukuwauna keta fwayafwayanama sina teweiya. **15-16** Amonai namoisi nofe tova Kenani fwayafwaya nenei si fakwifakwiya, taki tovanama yasi dewa ina gojomataiya, ana vimatadawanisiya keta ana kwavinisiya nofe fwayafwayanama nenei be sina yauna. Na uguna susukwau muka sina venumakavinaisi nofe kabainama nenei atu minominou yasi tovai yoke.

15:5 Noma 4:18, Ibeniu 11:12 **15:6** Noma 4:3, Ganetiya 3:6, Yemesa 2:23 **15:12** Yobi 4:13,14 **15:13** Yauna 1:1-14, Bunanige 7:6 **15:14** Yauna 12:40,41, Bunanige 7:7

Atu kwāga taūgu Ebenamu kuna vituvekamoka yo muniyai, biganei kuna mateya keta sina tauniwa.”

16

Sanai Keta Ega

¹⁻³ Ebenamu nofe tova Kenani i fakwafakwa naki manamana 10 atu kawana Sanai o kakanina, na fasinei keta muka tamo natuna ita vinatunei. Atu kana tookakikakina i viya ne Itifita kana wava Ega, na fasinei Sanai Ebenamu i iyaviya i bwaduwa, “Yave i nuvikakanikuwa be muka ana vinatuna, na fasinei ku nai be kaku tookakikakina nukusi kwa matave. Taki ina vivinatuna, gwadimonamona ana weniya vitana maise iyau natuku.” Fonana i vinowaniya keta Sanai yana kaetōga gumayogu Ega i veniya Ebenamu vitana kawana kana vinuwa.

¹⁵ Muniyai, Ega Ebenamu natuna namōga si vinatuniya keta i weniya Isimeni.

17

Yave Kana Kiyakiyaya I Teneteniya

¹ Tovanama Ebenamu kana manamana 99, Yave i kenokikinomana nenei keta i iyaviya i bwaduwa, “Iyau Guyau Tofiwanaonaona. Yaku ketaketai kuna niya be muka kuna go'yon, ² ebe yaku dedeni ana fufuniya neneweу ebe susukwau ana giviyagwanisiya.”

³ Ebenamu kaetutuna i viketogunisiya maise yota debabouna eatu Guyau i iyaviya i bwaduwa, ⁴⁻⁵ “Iyau

nenekuwai o nofemaise ku vanenēgei. Yaku dedeni kwāga nukusi maise, kwāga kunuma yagwanisi wāgasi. Na fasinei ka wava Ebenamu* eatu a weneweneviviya o Ebenaamu.† ⁶ Iyau ana saviviniya be kunuma nakasina kuna nisaiya be sabu yagwanisi sina kikinomana keta yota kwāga sabuumma nenesiyai tufomu sina kikinomana.

⁷ Yaku dedeni ana givifakiniya kwāga keta susukwau nukusi nenemiyai be ina fakwafakwavāgata, tova be tova. Iyau ya Guyau keta yota susukwau yasi Guyau. ⁸ Nofe Kenani fwayafwayana nenei ku viviteneuyauna, matatafunu fwayafwayanama kwāga keta yota susukwau ana venimiya. Naki yasi fwayafwayavāgata keta Iyau yasi Guyau.”

⁹⁻¹⁰ Guyau Ebenaamu i iyaviya i bwaduwa, “Kwāga fasiweu o yaku dedeni kuna muniya keta yota susukwau sina muniya. Kwāga sina nufifiniya kiyakiyaya neneueu maisemoka yota namōga tamokatamokāga susukwau sinenei. ¹¹ Yami nikana mutugabusi kwana nufifina be noko dedeni kana kiyakiyaya Iyau keta kwami kata kawasasai. ¹² Nofe tova keta ina niya, fwefweyanu namōga tamokatamokāga kana kuyadayada 8 nenei kwana nufifina. Kwana saviviniya natunatumi keta yami tobunanige natunatusi matatafusi namoāga nenesiyai. ¹³ Maisemoka yota tovanama namōga sina tufuwa yami sabu

* **17:4-5** Ibeniu fonasiyai, Ebenamu kana givina maise Ama nakasina o viwāgana. † **17:4-5** Ibeniu fonasiyai, Ebenaamu kana givina maise sabu yagwanisi amasi o wāgasi. **17:7** Nuke 1:55

17:8 Bunanige 7:5 **17:9-10** Bunanige 7:8, Noma 4:11

nenei eketa yota tovanama namōga vitamaneina nenei kwana viya, kwana nufifiniya nenesiyai. Ina vikiyakiyayavāgata yaku dedeni tofwamiyai, tova be tova. ¹⁴ Atu taki avi namōga yaku dedeni kana kiyakiyaya muka tofwanei, nai o kaku dedeni i yasiya, na naki tauna ina nutakiya yana sabu nenesiyai.”

*Yave I Bwadudabadaba Vitana
Sanai Ina Vinatuniya Namōga Kana Wava Aisake*

¹⁵ Guyau Ebenaamu i iyaviya i bwaduwa, “Kawau Sanai fasinei, muka kuna wenei Sanai eatu kuna weniya Sena.‡ ¹⁶ Ana sawanuwagabubuwiya be tanake nenei natuu namōga ana veniwa. Ana sawanuwagabubuwiya ebe kunuma sina visawayona nenei keta susukwana sinenei tufomu sina tufuwa.”

¹⁷ Ebenaamu kaetutuna i viketogunisiya maise yota debabouna keta na vinīgana tauna nuwasinenei i bwaduwa, “Kana fata namōga kana manamana 100 tamo natuna ina tufuwa? Atu yota Sena o kana manamana 90 kana fata ina vinatuna?” ¹⁸ Eketa Ebenaamu Guyau i iyaviya i bwaduwa, “Taki kana nufota Isimeni kuta sawanuwagabubuwiyal!”

¹⁹ Atu Guyau i iyaviya i bwaduwa, “Muka. Kawau Sena natuu ina vinatuniya keta kana wava kuna weniya Aisake.§ Yaku dedeni ana fufuniya tanake keta susukwana muninei nukusi nenesiyai tova be tova ina nivāgata. ²⁰ Ya

‡ **17:15** Ibeniu fonasiyai, Sanai, Sena wava nofe nuwesi kasi givina tufomu natuna gumayogu. § **17:19** Ibeniu fonasiyai, Aisake kana givina maise vinīga.

nuwanuwa Isimeni fasinei o naki a nowaniya. Na fasinei ana sawanuwagabubuviya be natunatuna keta susukwana yagwanisi ana veniya. Tanake o kawakawa nasi 12 amasi keta yota susukwana nenei kana kunuma ana givinakasiya. ²¹ Atu nofe yaku dedeni ana fufuniya Aisake nukusi. Naki nofe tovanama maise, Sena Aisake ina vinatuniya noko manamananama.”

18

Namōga Kasi Tonu Ebenaamu Si Venufotiya

¹ Yave Ebenaamu nenei i kenokikinomana Mamene yana kai nakanakasisi nenesiyai. Nofe kana si-fusifufumokena.

Kuyadayada i viaudibutoyōga kana tovai, Ebenaamu yana vada kana ketakawanai i nuvitōga i fakwafakwa. ² Matana i kanakasiya nenei namōga kasi tonu i kitisiya kutafakaina si misimisiya. Tovanama i kitisiya, vada i teweiya atu i dibwana i venufotifotisiya keta i koduwa fwayafwayai.

³ I iyavisiya i bwaduwa, “Aiye, taki kwa sanamaniya kaku nufota be ana ovivitimiya nao muka kwana niuniku. ⁴ Yami ukowa ana nemiiya be kaemi kwana kigona ebe yo kai sifunei kwana viyawasiya. ⁵ Yota kabwaga ana nemiiya be ina givifiwanimiya yo muniyai yami ketai kwana niya. Kwa visawanamonamoikuwa be kwa venufotikuwa, na fasinei ana savivina fasimiyai.”

Si iyaviya si bwaduwa, “Dewadewana, avana nuwanuwau ku bwaduviya maise o ku savivinei.”

6 Eketa Ebenaamu i dibwanamoka vadai i kanasuna keta Sena i iyaviya i bwaduwa, “Kuna omatakayakayakanaya be nimau simo ina badobadowa kausibi dewabauna kuna viya ebe maneka kuna kaguwana.” **7** Muniyai Ebenaamu i dibwana i niya bunumakau waumisi nenesiyai keta mwanavauna i vinuwadadaniya kakaninama i viya, yana tobunanige i veniya keta i venugidewadewiya.

8 Ebenaamu kedi* keta susu i danina yota viyo muwana nukusi i visiya kabwaginama gigidewadewana i nemiiya keta nausiyai i teniya keta kai sifunei si kawa atu i toğatanisiya.

9 Si nutoninuvenuviya si bwaduwa, “Atu namai kawau Sena?”

I nufata i bwaduwa, “Noko vada sinenei.”

10 Tamokağa sinesiyai i bwaduwa, “Venemokena, nofe tovanama maise noko manamananama ana makavinikuwa nenei kawau Sena natuu namoğa ina vinatuniya.”

Atu Sena o vada kana kawa muninei i vanevaneneiya. **11** Ebenaamu keta Sena o naki si vituvekamoka keta Sena yana tova vinatuna o naki i kakaviya. **12** Sena tauna i viniğä keta i bwaduwa, “Iyau naki a vineveka keta i sinavinukuwa keta yota kawaku i vituveka. Kana fata yawane kana diğadiğaina ana kamukoniya?”

13 Yave Ebenaamu i iyaviya i bwaduwa, “Ava uğuna yo Sena i viniğä atu i bwaduwa, ‘Naki a vineveka, venemokena gwadimonamona

* **18:8** Kedi o susu nenei si fufuniya. Ina fakwa kabegona kabağä ganagananavina nenei yo ina vibadowa keta kana ka yuyuna.

18:10 Noma 9:9 **18:12** 1 Fita 3:6

ana vinatuniya?" **14** Omasi tamo aviyavana daunamokena Yave nenei, muka kana nufota be ina savivinei? Naki a bwaduwa maise, nofe tovanama maise noko manamananama tovanama ana makavinikuwa neneweū, kawau Sena natuu namōga ina vinatuniya."

15 Sena i matuta na ūguna keta i sawavigema i bwaduwa, "Iyau muka tamo ata vinīga."

Atu i iyaviya i bwaduwa, "Mukamokena, ku vinīga."

Sodoma Sifufuna

16 Ebenaamu keta namōga kasi tonu nukusi si misiniya keta si niniya be ina vateweisiya yasi ketai. Nokomai si kitanusinowa Sodoma nenei.

17 Keta Yave tauna nenei i bwaduwa, "Aviyavana kabegomokena ana saviviniya, muka Ebenaamu nenei ana teneviunei. **18** Susukwana ina nakata yota fiwafwanamokena. Keta tanake nenei kunuma matatafuna fwayafwayai ana sawanuwagabubuwisiya. **19** A gibokiya be tanake ina iyavisiya natunatuna keta yota susukwana muninei si nenemiya, ebe yaku ketaketai sina savivina dawaniniina yota kana matanatotowai. Ebe avana Ebenaamu nenei a bwadudabedabiya maise kana fata be ana saviviniya."

20 Keta Yave Ebenaamu i iyaviya i bwaduwa, "Menana Sodoma keta Gomona namoisi yasi fufunagoyo i nakatamoka keta yota fasisiyai odo nakasina a nowaniya. **21** Nofe naki a sobusobuwa be ana kitiya taki noko odosima tasike fasisiyai venemokena o muka, ebe ana sanamaniya."

22 Namoġa nasi nuwa si noġokawawa keta si niya Sodoma kuweyaina, eatu Ebenaamu i fakwa i misimisiniya Yave naunei. **23** Ebenaamu i vaniya niniunei eketa i iyaviya i bwaduwa, “O venemokena namoġa goyosi keta eyaeyasi nukusi kuna nuyaunisiya? **24** Taki namoġa eyaeyasi nasi 50 menana noko sinenei o namaise, yawane kuna nuyauniya? Taki eyaeyasi fasisiyai o namaise, menananama kuna kitamokiya? **25** Muka kuna fufuniya, nai o muka dawaniniina. Keta muka kana nufota be namoġa eyaeyasi atu goyosi nukusi kuna nuvimateisi. Taki kuna saviviniya, nao goyosi kasi vimatadawanai eyaeyasi nukusi kuna nunatusiya. Muka. Kwaġa o fwayafwaya kana matatafu kana tonuvisi, na fasinei kwaġa kuna vinuwadadanikiya venemokena namoġa kama matanatotowai, abe namaise.”

26 Yave i iyaviya i bwaduwa, “Namoġa matata-fusi Sodoma sinenei ana gifafafanisiya taki namoġa eyaeyasi sinesiyai kasi 50 ana nisaisiya.”

27 Ebenaamu i bwadu-savaviniya i bwaduwa, “Yaku tuveka, iyau o ibakaokaoġo maise gavi keta kausibi atu yota a vibutuwa a nunusifufuwa nofe fasinei. **28** Taki namoġa eyaeyasi kasi 50 eatu 5 nenei ina kesa, noko menaninama kuna nuyauniya?”

Yave i iyaviya i bwaduwa, “Taki namoġa eyaeyasi kasi 45 ana nisaisiya, nao muka ana nuyaunei.”

29 Ebenaamu i vikokone-savaviniya i bwaduwa, “Atu namaise taki kasi 40moka nokomai kuna nisaisiya?”

Atu i iyaviya i bwaduwa, “Taki kasi 40, muka ana fufuniya.”

30 Ebenaamu i iyaviya i bwaduwa, “Ae yaku tuveka, muka kuna nuwagoyoweiku eatu kuta tenikuwa be ata nusifufuwa. Namaise taki nasi 30 nokomai?”

Keta i iyaviya i bwaduwa, “Taki 30 ana nisaisiya, muka ana fufuniya.”

31 Ebenaamu i iyaviya i bwaduwa, “Eiyoi, naki a nusifufumataiya nofe fasinei atu namaise taki 20 kuta nisaisiya?”

I iyaviya i bwaduwa, “Taki 20 ana nisaisiya, muka ana nyaunei.”

32 Yota Ebenaamu i bwadu-savaviniya i bwaduwa, “Ae yaku tuveka, muka kuna nuwagoyoweiku. Atu naki kawa tamokağamoka yota ata bwaduwa. Atu taki 10 kuta nisaisiya?”

I iyaviya i bwaduwa, “Taki 10 ana nisaisiya, muka ana nyaunei.”

33 Tovanama si nusifufukooğga, Yave Ebenaamu i venuteweiya keta i niya, eatu Ebenaamu i makaviniya yana menanai.

19

Menana Sodoma Keta Gomona Kasi Nuyauneina

1 Guyau kana kaetoğga abamei kasi nuwa navinavimokeyai si kikinomana Sodoma. Nota menana kana ketakawanai i nuvitoğga i fakwafakwa. Tovanama i kitisiya, i misiniya i venufotifotisiya eketa nausiyai i koduwa fwayafwayai. **2** Keta i iyavisiya i bwaduwa, “Aiye, kwa nemai yaku numai be a oviviteimi. Eatu kaemi kwa kigona be kwa viyawasi, eatu kumana matami kwa kitakiyei yo yami ketai kwana niya.”

Atu si iyaviya si bwaduwa, “Muka tamo avana. Naki nofemai kana toğanumasana.”

³ Atu i gxaeğemokisiya keta nukusi si niya yana numai. Keta ka i fufuniya fasisiyai. Maneka muka na kana nutuva i kaguwana keta si kawa.

⁴ Muniyai yo sina banuwa, Sodoma menana gunina be ovina kana tufunakata be vituvekasi, matatafumokesi nokomai numa si misini-fanakwariuwiya. ⁵ Nota nenei si bwauwa si bwadubwaduwa, “Namoga kasi nuwa kimoki nuwabuna si nemiya nenewe, nama o fiyaomokesi? Ku kikinomana-nemiyeisi nenekiyai be ka mataveyeisi.”

⁶ Nota i misini-kikinomana numa kawanei atu kumunina kawa i katuguduya. ⁷ Keta i iyavisiya i bwaduwa, “Ae unaunaku, fufuna naki goyomokena muka kwana savivinei.

⁸ Kwa vaneneğeiku! Natunatuku vivine kasi nuwa weka, muka tamo namoğa nukusi sita matavenuvanuva. Taki nuwanuwami maise vivinesima ata kikinomana-nemiisiya nenemiyai be aviyavana yami nuwanuwa kwata saviviniya nenesiyai. Eatu namoğa nofe a nemiisiya kanonovakuwai, muka kwana ginuvanuvaishi.”

⁹ Atu si kawafatiya si bwaduwa, “Ku misininai! Kwağa tene wagawaga ku nemiya atu nuwanuwau avage kuna vikainakata. Kimoki kwağa kana givikuvavaniwa nakatamokena yo tasike nasi nuwa.” Eketa na yasi fiwana Nota si katutunetuniya numa kana kawa kuweyaina avage nuwanuwasi kawa sina vitutuyakweniya.

10 Atu kaetōga kasi nuwa numa sinenei nimasi si kitunina, Nota si sinaviya keta si sinakanasuniya eketa kawa si katuguduya. **11** Atu yasi fiwana nenei namōga matatafusi menanai matasi si weikwava be muka kasi fata kawa sina nisāgai.

12-13 Eketa namōga nasi nuwa Nota si iyaviya si bwaduwa, “Tova kabegomokena menana nofe kana nyauniya. Yave odo nakatamataina i nowaniya menaninama fasinei keta i visimeikiya ka nemiya be kana nyauniya. Atu tamo ya sabu nofemai? Maise natunatuu namōga keta vivine o nawanawau o taki aitevana tamo yota ya sabu menana nofe sinenei, ku kikinomaneisi.”

14 Eketa Nota i kikinomana menanai keta natunatuna vivine kasi sawagivifoteina i matakawisiya. I iyavisiya i bwaduwa, “Yave kabegomokena menana nofe ina nyauniya. Kwa venudibwana be menana nofe kwa teweyei.” Atu namōgasima si bwaduwa vitana ita sawasawavinīga.

15 Naki tova i gegegesiya kana manawasasai, kae-tōgasima Nota si tuyakayakaniya be ina venudibwana. Si iyaviya si bwaduwa, “Ku venudibwana! Kawau be natunatuu vivine nasi nuwa nukusi ku kikinomaneisi. Akata ina kakaviwa tovanama Yave menana nofe ina vimatadawaniya nenei.”

16 Atu Nota i giwaewaēgeya. Yave Nota i sineganiganiya na fasinei keta kaetōga kasi nuwa nimanei si nufatuma yota kawana be natunatuna nimasiyi eketa si kikinomanisiya kawayavatai. **17** Tovanama si kikinomanisiya menanai, kaetōga tamokāga i iyavisiya i bwaduwa, “Kwa dibwana be kwana fakwa yawayawasimi! Muka kwana okikine

kumunimi yota muka kwana niviyawasinai kawanauwai! Kwa dibwanamoka koya nenesiyai akata ina kakavimiya.”

23 Tovanama Nota ugunina nukusi menana Sowa* nenei si kikinomana, vanavana i kusifuya. **24** Yo muniyai iba nununuina muna nenei maise,† Yave i visaviviniya keta abamei i sobunemiya Sodoma keta Gomona nenei. **25** Eketa naki kana menana be kana namōga be yota kisisiku matatafumokena kawanaunama nenei i siwataunisiya. **26** Atu Nota kumunina kawana si okikineya keta si vitasiya maise gabana.

21

Aisake Yana Tufuwa

1 Yave Sena i sawanuwagabubuwiya keta avana yana bwadudabadaba maise i fufuniya. **2** Tutuyanama Guyau i bwaduwiya nenei aviyavana ina kikinomana, naki i nuvifotiya. Sena i visifūga keta i vinatuniya natuna namōga tovanama Ebenaamu yana vituveka nenei. **3** Gwadimonamonanama i tufuwa keta Ebenaamu i weniya kana wava Aisake. **4** Kuyadayada 8 muninei, Ebenaamu natuna nenei nuffifina i saviviniya kiyakiyaya fasinei, namaise Guyau i visimeiya maise.

* **19:23** Ibeniu fonasiyai, Sowa kana givina maise kabego.

19:24 Madiu 10:15, 11:23,24, Nuke 10:12, 17:29, 2 Fita 2:6, Yudi 1:7

† **19:24** Vinebau fonasiyai iba nununuina si weniya sanufa. Taki sanufa tana guwaniya, madina o goyomokena keta yota inainana nakatamokena. **19:26** Nuke 17:32 **21:2** Ibeniu 11:11 **21:4** Kabikona 17:12, Bunanige 7:8

⁵ Ebenaamu kana manamana 100 nenei Aisake i tufuwa.

*Ebenaamu, Ega Natusi Isimeni Nukusi
I Vikikinomanisiya*

⁸ Gwadimonamona i nakata keta tovanama i sokeya nenei, Ebenaamu visoke kana ka i fufuniya.

⁹ Noko tovanama nenei Sena si kitiya Isimeni Aisake i sawasawaviniya. Isimeni o Ebenaamu natuna kana vinuwa, ne Itifita kaetoġa kasi wava Ega nenesiyai i tufuwa. ¹⁰ Eketa Ebenaamu si iyaviya si bwaduwa, “Kaetoġa nofe na natusi ku vikikinomaneisi. Muka simo nuwanuwaki tamo ya kaikaiwabu ina vai tovanama kuna mateya. Naki natukiġa.”

¹¹ Ebenaamu i nuwatadauna bwadunama fasinei uġuna Isimeni o yota natuna. ¹² Eatū Guyau i iyaviya i bwaduwa, “Muka nuwanuwa ina munuu kaetoġa na natusi nukusi fasisiyai. Avana Sena si bwaduwija maise ku fufuniya. Uġuna Aisake nenei, susukwanama ka wava sina gikikinomaniya. ¹³ Atu kaetoġa natusi o kwaġa natuu, na fasinei susukwana yota ana givinakasiya be ina vikunuma.”

¹⁴ Eketa tova i katakiya nuwabunimokeyai, Ebenaamu tukwawa na ukowina keta kabwaga, Ega i vikavanisiya eketa na natusi i teweisiya si niya.

22

Yave I Anuvanuviya Ebenaamu Yana Vitumaġana

¹ Muniyai Guyau i anuvanuviya Ebenaamu yana vitumaġana. I iyaviya i bwaduwa, “Ebenaamu!”

Eketa i vinowana i bwaduwa, “O, iyau weka.”

² Keta Guyau i iyaviya i bwaduwa, “Natuu tamokağamoka ku nuwagabubuviya Aisake, ku ovai be ku niyei fafani Moniya nenei. Koyanama namai ana visawaveniwa nenei, kuna vibwanaoseiya ya vikanakooğa bwanaosena nenekuwai.”

³ Na fasinei Ebenaamu nuwabunimoka i misiniya, yana doniki i gidewadewiya keta i kaiuna vibwanaose fasinei. Eyo tobunanige nasi nuwa keta natuna Aisake i ovisiya keta si noğokawawa kabainama Guyau i bwaduviya nenei si niya. ⁴ Si niniya atu kuyadayada kana vitonu nenei, Ebenaamu matana i kanakasiya keta kedawanauwai kabağanama i kitiya. ⁵ Tobunanige i iyavisiya i bwaduwa, “Doniki nukusinofemai kwana fakwa. Atu natuku nukusi kana niya nokomai, Guyau nenei kana kodukoduwa yo kana makavinikiya nenemiyai.”

⁶ Eketa Ebenaamu kai kitavina natuna i vikavaniya eatu tauna o kikanakanata keta giniwakuma i givikavinisiya keta si niya. ⁷ Si niniya atu Aisake amana i iyaviya i bwaduwa, “Amaku!”

Ebenaamu i iyaviya i bwaduwa, “Natuku, ku nusifufu.”

Eketa Aisake i iyaviya i bwaduwa, “Kikikweu keta kikanakanata o nofe, eatu sifi mwanavauna vikanakooğa bwanaosena fasinei o namai?”

⁸ Ebenaamu i iyaviya i bwaduwa, “Natuku, Guyau tauna yawane sifi mwanavauna ina venita vibwanaose fasinei.” Eketa si nikaokaogowa si niya.

⁹ Tovanama si nemiya kabainama namai Guyau i bwaduviya nenei, Ebenaamu didiğä i didiiya keta etanei kai i tewesonasonamiya. Eyo

muniyai, natuna Aisake nimana keta kaena i kiyona eketa didīgai kai etanei i vikenofaniya. **10** Yana giniwakuma i sinayaginiya be natuna ina nuvimatiya. **11** Eatu tovanama nenei, abamei Yave kana kaetōga i bwauwiya i bwaduwa, “Ebenaamu! Ebenaamu!”

Ebenaamu i vinowana i bwaduwa, “O, iyau weka.”

12 Eketa Yave kana kaetōga i iyaviya i bwaduwa, “Muka natuu kuna givikuvakuvavanei o avana tamo goyona kuna fufuniya nenei! Nofe kimoki o a sanamanemokiwa gewa Guyau ku vifotuwiya ūguna natukatekateu atu muka kuta nuwanononei nenekuwai.”

13 Ebenaamu matana i kanakasiya keta sifi namōga i kitiya kisisiku sinenei ketuketuna kana vināganāgana nenei i nukabwakuya. I niya yomuyomunama i viya, i nuvimatiya keta i vikanakōgiya yana bwanaose Guyau nenei eatu muka natuna. **14** Noko nenei eketa kabainama i weniya *Yave Ina Venita*. Nofe tovasima nenesiyai namōga yasi kafa tanatutuna si bwadubwaduwa, “Yave yana koyai ina venita.”

15 Eketa abamei Yave kana kaetōga Ebenaamu i bwauwe-savaviniya i bwaduwa, **16** “Nofemaise Yave i bwaduwa, ‘Fonaku ku nowaniya keta natukatekateu atu muka kuta nuwanononei nenekuwai na ūguna kaku wavai a bwadudabadaba nenewe, **17** vitana venemokena ana sawanuwagabubuwiwa be susukwau nakatamokena ana veniwa. Sina yagwana vitana kinavinavi abamai yota numagama kwadewai maise. Kasi aviya sina vatanisiya keta yasi menana sina vitoniwigina.

18 Susukwau nenesiyai eketa kunuma matatafusi fwayafwaya etanei ana sawanuwagabubuwisiya uğuna fonaku ku muniiya.”

19 Ebenaamu na natuna si makavinisiya yana tobunanige nenesiyai eketa matatafusi si makavinisiya Biyasiba namai Ebenaamu i fakwafakwa nenei.

Sena kasi manamana 127 nenei, yawasisi i kakaviya keta Ebenaamu i nunuwatadauna eatu i vivinuwadadana kasi odewadewa fasinei. Na fasinei fafaninama Itai namoisi si fakwafakwiya nenesiyai, fwayafwaya kabegona i vitamaniya gabana nenei.

Manamana tonusi i kakavisiya muninei, Ebenaamu natuna Aisake, ne Anani kana wava Nibeka i vikawaniya. Tanake o Ebenaamu unana wağana. Muniyai Ebenaamu kana manamana 175 nenei, yawasina i kakaviya keta natunatuna nasi nuwa Aisake keta Isimeni si odewadewiya kawana niniusiyai.

25

Isowa Keta Yakobo Si Tufuwa

19 Ebenaamu natuna Aisake na natunatuna sisifufusi nofemaise. **20** Tovanama Aisake kana manamana 40 nenei Nibeka i vikawaniya. Nibeka tawağana o Nebani keta amasi o Betuweni tene Anami fafanı Fadana-anami nenei.

21 Nibeka tanake kakanina keta Aisake i kawanunuwiya Yave kawana kana ovivita fasinei. Yave yana kawanunuksi i nowaniya eketa Nibeka i visifugä. **22** Atu bebeta si vivikafifiwana manawanei keta i bwaduwa, “Namaise yo savivina

nofe i kikikinomana nenekuwai?” Eketa i niya Yave i kawanunukuviya ibanama fasinei.

²³ Eketa Yave i iyaviya i bwaduwa,

“Sineweū o kunuma nuwesi.

Sina tufuwa nenei, sina vikavanevaneya.
Tamo kunuma o unana ina fiwanateweiya.

Kotokikinuna ina vikaetōga gwadiyei nenei.”

²⁴ Tovanama Nibeka i vinatuna nenei, natuyuweyuwe namōga si tufuwa.

²⁵ Kotokikinuna i tufuwa o sininina yabeyabenina atu konokonona. Na fasinei si weniya Isowa.* ²⁶ Muninei gwadiyei i tufuwa, Isowa kaeketuketunei i gitotowa. Na fasinei si weniya Yakobo.† Aisake kana manamana 60 nenei natuyuweyuwe si tufuwa.

Kotokikinuna Kana Vitovisime Isowa I Katuteweiya Yakobo Nenei

²⁷ Tovanama namoisima si nakata, Isowa i vitonuiyowa eketa tova matatafunu wanakiyai i nunuiyowa. Eatu Yakobo o umaumana keta tōgakuyadayadana. ²⁸ Aisake o Isowa i nuwagabubuviya ūguna nuiyo gevagevana nuwatana i viya, eatu Nibeka o Yakobo si nuwagabubuviya.

²⁹ Tova tamokāga Yakobo fenifeni i nunubudana atu wanakiyei Isowa dibuna i toyōga yota na vitanonina i kikinomananemiya. ³⁰ Eketa

^{25:23} Noma 9:12 * ^{25:25} Ibeniu fonasiyai, Isowa kana givina maise tufukono. † ^{25:26} Ibeniu fonasiyai, Yakobo o kaeketuketu kana togitoto. Kana givina maise tovikanonono.

Isowa Yakobo i iyaviya i bwaduwa, “Vitanona i kanamunumokikuwa. Nofe tova nubudana yabeyabenina simo ku veneiku a kawa.” (Noko nenei keta kana wava venuwana si weniya Edomu.)‡

³¹ Keta Yakobo i iyaviya i bwaduwa, “Vikinuna kana vitovisime nofe tova ku vitamanei nenekuwai ebe yo nubudana ana veniwa.”

³² Isowa i iyaviya i bwaduwa, “Ei, i kanamunumokikuwa! Vikinuna kana vitovisime o avana kana dewadewana!”

³³ Eketa Yakobo i iyaviya i bwaduwa, “Nauna ku bwadudabadaba nenekuwai yoke.” Eketa Isowa i bwadudabadaba vikinuna kana vitovisime kana dawanatamaneina fasinei.

³⁴ Noko muninei Yakobo maneka keta nubudana Isowa i veniya. I kawa, i yuwa eketa i niya. Nofe ketaketanama nenei Isowa muka ita vinuwana vikinuna kana vitovisime fasinei, eatu naki i katuteweiya.

26

Yave I Bwadudabadaba Aisake Ina Sawanuwagabubuwiya Maise Ebenaamu

¹ Noga nakasina manatuwaina Ebenaamu yana tovai maise, yota Kenani i visavavinisiya. Na fasinei Aisake i niya menana Gena nenei, Finisitiya kana tufomu kana wava Abimeneki nenei.

² Yave i kenokikinomana Aisake nenei keta i iyaviya i bwaduwa, “Muka kuna nai Itifita eatu namai fwayafwayanama ana iyaviwa nenei, nokomai kuna fakwa. ³ Nofemai simokağamoka

‡ **25:30** Ibeniu fonasiyai, Edomu kana givina maise yabena.

25:33 Ibeniu 12:16 **26:3** Kabikona 22:16-18

kuna fakwa. Iyau kwaǵa nukusi eketa ana sawanuwagabubuwiwa. Fwayafwayanama nofe matatafunu susukwau nukusi ana venimiya ebe avana amau Ebenaamu a bwadudabedabiya maise, bwadudabadabanama ana givifakiniya.

⁴ Susukwau yagwanina ana veniwa maise kinavinavi kasi yagwana abamai. Keta fwayafwayanama nofe matatafunu ana venisiya. Tasike nenesiyai, kunuma matatafusi fwayafwaya etanei ana sawanuwagabubuvisiya.

⁵ Uguna Ebenaamu fonaku i muniiya, yaku bwadu i nowaniya yota yaku gisawakedana be yaku visime matatafunu, i muniyekoǵoiya.” ⁶ Na uǵuna eketa Aisake i fakwa menana Gena nenei.

Muniyai Aisake i niya keta Biyasiba i fakwa. Tovanama yana vituveka nenei, natuna gwadiyei Yakobo i nonuya. Vikanononowai, vikinuna kana sawanuwagabubu i viya. Tovanama Isowa i nowaniya, i kayokuǵa keta nuwanuwana ita nuvimatiya.

28

Yakobo I Niya Nebani Nenei

¹ Aisake i bwauwiya Yakobo keta i sawanuwagabubuviya yo i sawakedakedaniya i bwaduwa, “Muka nofemai tamo ne Kenani kuna vikawaniya. ² Atu nofe tova kuna niya Fadana-anami nenei, ayou amasi Betuweni menaninei. Nokomai tamo kawau kuna viya auǵu Nebani natunatuna sinesiyai. ³ Eatu Guyau Tofiwanaonaona ita sawanuwagabubuviwa be natunatuu sita yagwana be susukwau

sita geyana ebe kunumisi sita yagwana. ⁴ Tanake ita sawanuwagabubuwiwa keta yota susukwau, maise Ebenaamu i sawanuwagabubuwiya. Ebe fwayafwayanama ku fakwifakwiya maise teneyauyauna kuta vitoniwagiya. Uguna fwayafwayanama o Guyau i veniya Ebenaamu.”

Yakobo Kana Kavayuna

¹⁰ Yakobo Biyasiba i teweiya eatu i niya Anani kuweyaina. ¹¹ I niniya atu kabaǵa tamokaǵa i nisaiya eatu naki vanavana i sinakafwanukuwiya fasinei eketa i vikabaǵa. Gabana i viya keta i kenovikifafiya. ¹² Tovanama i banubanuwa nenei, i kavayuna. I kitiya abama i kawiya atu ke'ta nutanababainina, fwayafwayai i misiniya atu i vaneya abamai. Keta Guyau kana kaetogá abamei si sobusobuwa be si vanevaneya. ¹³ Atu Yave i misiniya niniunei eketa i iyaviya i bwaduwa, “Iyau Yave, waǵau Ebenaamu keta Aisake yasi Guyau. Fwayafwayanama nenei ku matamataveya, kwaǵa keta susukwau ana venimiya. ¹⁴ Kimoki yo susukwau maise genasa, sina kataneneǵa yavanata, gagasa, bomatu, keta nanakoya kuweyaisi nenesiyai. Keta susukwau nukusi kami sawanuwagabubu nenei, fasekwa matatafusi fwayafwaya etanei ana sawanuwagabubuwiya. ¹⁵ Kuna tukutukuya, Iyau o kwaǵa nukusi keta ana nuvinanuwa ya nidadana nenesiyai kana nivaniva ana makaviniwa fwayafwayanama nofe nenei. Muka ana venumakanoveu kana nivaniva aviyavana a bwadudabedabiwa maise ana fufuniya.”

16-17 Yakobo i kenoviniya na yana matuta keta i bwaduwa, “Venemokena gewa Yave o nofemai i fakwafakwa eatu muka ata sanamanei. Kabağā nofe a vimaimatumatuta. Nofe o Guyau yana kabağā keta abama kana ketakawana.”

18 Eketa nuwabunimokeyai Yakobo i misiniya keta gabananama i kenovikifafiya, i vimisiniya kiyakiyaya fasinei keta bubu nenei i vitowiya.

19 Eketa kabağanama i weniya Beteni.* Eatu menaninama nakasina si mikiweniya Nusi.

20 Yakobo i bwadudabadaba Guyau nenei i bwaduwa, “Taki kwağā iyau nukusi be kuna ofafafikuwa, kabwaga kuna venikuwa, nuya kuna venikuwa, **21** ebe taki ana makavinikuwa na yaku dewadewana amaku yana numai, enao kwağā Yave yaku Guyau. **22** Atu gabana nofe a vimisiniya, ita vikiyakiyaya Guyau ya numa. Aviyavana matatafunu kuna venevenikuwa, dawana 10 ana tenetenisiya atu sinesiyai tamokağā kwağā ana veneveniwa.”

35

Yakobo i niya Anani keta Nebani natunatuna nasi nuwa, Neya keta Neiseno, i vikawanisiya. Manamana 14 i mudadava Nebani fasinei vivinesima kasi nufata fasisiyai. Neya kasi kaetogā Dinufa si veniya Yakobo kawana. Maise yota Neiseno kasi kaetogā Binaa si veniya Yakobo kawana. Eatu Guyau i iyaviya keta nawana yana menana i teweiya atu i makaviniya amana yana menanai. Yana makavinafasinei, i matuta akata Isowa yana namonamoğā

* **28:19** Ibeniu fonasiyai, Beteni kana givina maise Guyau yana numa.

nukusi na ugunina sina tafisiya. Eatu tovanama si vikaninisāga nenei, Isowa muka ita nuwagoyo be nukusi sita vikamunumunuwa.

Guyau Yakobo I Sawanuwagabubuwiya

9 Tovanama Yakobo i fakwafakwa Fadana-anami* atu i makaviniya Beteni nenei, Guyau i kenokikinomana-savaviniya keta i sawanuwagabubuwiya. **10** I bwaduwa, “Ka wava Yakobo atu muka yota sina weneu Yakobo. Kimoki keta i niniya ka wava Isineni.”† Eketa i weniya Isineni.

11 Yota i bwaduwa, “Iyau Guyau Tofiwanaonaona. Kuna vinatunasiwasīwāga keta kuna yagwana. Susukwau ina nakatamoka. Fasekwa dawanisi yota tufomu sina kikinomana kwāga nenewe. **12** Fwayafwayanama a bwadudabedabiya Ebenaamu be Aisake nenesiyai, kwāga ana veniwa. Yota susukwau nenesiyai nofe fwayafwayanama ana venisiya.” **13** Guyau tovanama Yakobo nenei i nusifufukōga, i teweiya.

14 Kabainama nenei Guyau i nusifufuviya, gabana i vimisiniya keta etanei waini i siwaiya yana bwanaose yota muniyai bubu i siwaiya. **15** Eketa Guyau nokomai i nusifufuviya fasinei, kabainama i weniya Beteni.‡

Neiseno Yasi Mate

* **35:9** Fadana-anami o Anami katuyaveyavenina Mesofotamiya nenei yavanata kuweyaina. Eketa Anani menana o sinenei.

† **35:10** Ibeniu fonasiyai, Isineni kana givina maise Guyau i maniniya o Guyau nukusi si vikafifiwana. (Kabikona 32:28) **35:11** Kabikona 17:4-8 **35:14** Kabikona 28:18,19 ‡ **35:15** Ibeniu fonasiyai, Beteni kana givina maise Guyau yana numa.

16 Muniyai Yakobo yana sabu nukusi Beteni si teweiya. Keta yawane Efanati kedawanau, Neiseno i vibutusiya atu si nisaiya daunina. **17** Si vibaiiya eatu kuvavana i gimunusiya nenei, kasi toosiwaġa si sawakatevatusiya si bwaduwa, “Muka kwana matuta. Natumi namoġa kana vinuwa i tufuwa.” **18** Tovanama ayona yawasisi i kakakaviya nenei, si weniya Benoni§ eatu amana i weniya Beniyamina.* **19** Tovanama Neiseno si vidawana, ketanama i niniya Efanati (nofe tova o Beteniyema), kafakainei si odewadewisiya. **20** Eketa Yakobo gabana i vimisiniya kasi manawa etanei. Gabaninama Neiseno kasi manawa nenei nofe tova i fakwafakwa.

*Aisake Yana Mate
1 Sifusifufu 2:1-2*

- (22b) Yakobo natunatuna namoġa kasi 12.
23 Neya natunatusi namoġa o Nubeni, Yakobo natuna kotokikinuna. Muninei o Simiyoni, Nebi, Yuda, Isaka, Sebunoni.
24 Neiseno natunatusi namoġa o Yosefa keta Beniyamina.
25 Neiseno kasi kaetoġa Binaa natunatusi namoġa o Dani keta Nafatanai.
26 Neya kasi kaetoġa Dinufa natunatusi namoġa o Gada keta Asa.

Yakobo kakawana nofemaise natunatuna namoġa si vinatunisiya Fadana-anami nenei.

§ **35:18** Ibeniu fonasiyai, Benoni kana givina maise kuvavana natuna. * **35:18** Ibeniu fonasiyai, Beniyamina kana givina maise natukikataiku.

²⁷ Eketa Yakobo i makaviniya amana Aisake nenei, Kiniyati-aba (nofe tova o Ebinoni) niniunei menana Mamene nenei. Nofe menaninama Ebenaamu i fakwiya muninei yota Aisake i fakwiya maise teneyauyauna. ²⁸ Aisake i fakwa kana manamana 180. ²⁹ I sobuwa i vigwadimonamonamoka yo muniyai yawasina i kakaviya keta waḡawaḡana i tuyanomwanisiya. Eketa natunatuna namoḡa Isowa be Yakobo si odewadewiya.

37

Yosefa Keta Sisitawaḡana

¹ Kenani fwayafwayana namai Aisake i fakwiya be nenei i viteneyauyauna yota Yakobo i fakwa.

² Eketa Yakobo na natunatuna sifusifufusi nofe-maise.

Tovanama Yosefa kana manamana 17, sisitawaḡana nukusi sifi keta gouti si kikitavikavinisiya. Sisitawaḡanasima o amana kakawana Binaa keta Dinufa natunatusi, eatu yasi fufunagoyo fasisiyai Yosefa i simanisiya amana nenei.

³ Yakobo yana vituveka nenei Yosefa i tufuwa eketa i nuwagabubuviya nakasina yo muniyai natunatuna namoḡa matatafusi. Na fasinei kana kwame nubwayouna dewabauna i veniya.

⁴ Tovanama sisitawaḡana si kitia Yosefa kana nuwagabubu nakatamataina yo muniyai tasike, si adibutoyotoyoiya keta muka viunana kana bwaduwai sita nunusifufuwei.

⁵ Nuwabuna tamokaġa i kavayuna keta tovanama sisitawaġana kana kavayuna i iyavisiya nenei o naki si dibutoyoġemokiya. ⁶ Yosefa i iyavisiya i bwaduwa, “Kwa vanenēga tu kaku kavayuna a iyaveimi. ⁷ Bagunai witi ta vivikitava eatu yaku kitava i venukanakasiya keta i misiniya. Tovanama nenei yami kitava si misinififiya yaku kitava keta nenei si koduwa.”

⁸ Eketa sisitawaġana si iyaviya si bwaduwa, “Oa! Omasi ku vinuwadadana avage venemokena kuna vitufomuwa be kuna visimeikiya?” Noko nenei, Yosefa yana bwadu be kana kavayuna nenei si adibutoyotoyoġemokiya.

Yosefa Sisitawaġana Si Vitamaniya

¹² Tova tamokaġa Yosefa sisitawaġana, amasi yana sifi keta yana gouti si visiya keta si niisiya menana Sekemu niniunei, keta nokomai si kitavikavinisiya.

¹³ Eketa Yakobo Yosefa i iyaviya i bwaduwa, “Sisitawaġau o Sekemu nenei yomuyomu si kitakitavikavina. Nuwanuwaku ana visimeiwa kuna niya nenesiyai.”

Yosefa i vinowana i bwaduwa, “Dewadewana, Ana niya.”

¹⁴ Eketa amana i iyaviya i bwaduwa, “Ku nai be sisitawaġau ku kitaisi taki yomuyomu nukusi dewadewasi, nao kuna makaviniwa kuna matakawikuwa.”

Ebinoni kawanauna nenei Yosefa i visimeiya i niya Sekemu. ¹⁵ Tovanama i kikinomana, i kakafivinavina kawayavatai atu namoġa tamokaġa i nutoniiya i bwaduwa, “Ei, aviyavana ku nunuwasai?”

16 Yosefa i nufata i bwaduwa, “Sisitawaġaku yasi yomuyomu si kitakitavikavina, a nunuwasisiya. Ku sanamanisiya namai kasi tuġana?”

17 Eketa namoġanama i iyaviya i bwaduwa, “Si nemiya wekamai atu naki si niya. A nowanisiya si bwaduwa si niniya Dotani.” Noko nenei Yosefa sisitawaġana i muniisiya keta Dotani i nisaisiya.

18 Tovanama si kitiya kedawanauwai i nenemiya, kana munuwa fasinei si viwaifufuna. **19** Tututausi si vikanunusifusifufuwa keta si sawaviniyya si bwaduwa, “Ake, tokavayuna-onaanonama kwa kitai i nenemiya. **20** Ei, ta nuvimatei be tamo yeyenu kokonina nenei ta tewesobuwei. Kana fata amata tana iyaviya avage tamo yomuyomuwanawanaki i kaniya, ebe tana kitiya taki kana kavayuna ina vivenemokena o muka.”

21 Atu Nubeni i nowaniya yasi bwadu eatu i vinuwadadana Yosefa kana guguya fasinei keta i iyavisiya i bwaduwa, “Muka yawasina tana nuyaunei. **22** Muka tana nuviufaufai atu nofemai wanakikaoġowai tata tewesobuwiya yeyenu kokonina nenei.” Nubeni i tanafafafana taina kana guguya fasinei uġuna nuwanuwana be ina niiya amana nenei.

23 Eketa tovanama Yosefa i kikinomana, sisitawaġana si givikaviniya keta kana kwame nubwayouna dewabauna tofwanei si kakiya. **24** Si oviya keta yeyenu kokoninei si tewesobuwiya.

25 Tovanama si makavina keta si nuvitōġa si kakawa atu matasi i kanakasiya keta Isimeni fasekwina si kitisiya si nenemiya na yasi kameni

Gineyadiyei, si niniya Itifita. Iba mamadisi* nukusi si kivitotoğā.

²⁶ Keta Yuda unaunana i iyavisiya i bwaduwa, “Taki taita tana nuvimiatiya keta ufaufana tana tenemakaviuniya, aviyavana tamo kana dewadewana tana nisağai? ²⁷ Isimeni namoisi nenesiyai ta vitamanei eatu muka tana munuya. Aitevana taina yoke, kita viyo ufaufa tamokağā.” Eketa unaunana yana bwadunama si vinowaniya.

²⁸ Tovanama Midiyani† tovitamaneina si kikinomana, Yosefa sisitawağana si niya yeyenu nenei si sinakikinomaniya keta Isimeni namoisi nenesiyai, si vitamaniya fatana siniva 20. Eketa Yosefa si niiya Itifita.

²⁹ Eyo muniyai toyanama Nubeni i makaviniya, i niya yeyenu nenei i nugenanana eatu muka Yosefa ita kitai. Nuwatana i dauna keta kana nuya i kiganiniya. ³⁰ I makaviniya sisitaina nenesiyai keta i iyavisiya i bwaduwa, “Yosefa noko muka. Ava o ata fufuniya?”

³¹ Eketa Yosefa sisitawağana, gouti si nuvimiatiya keta ufaufanei kwame si kutuviya. ³² Eyo si niiya amasi nenei keta si iyaviya si bwaduwa, “Kwame nofe ka nisaiya, ku kitai. Kamo natuu kana kwame o muka?”

³³ Amasi i kitakinaniya keta i iyavisiya i bwaduwa, “Ika. Natuku kana kwame. Yomuyomuwawanawanaki i kaniya. O natuku! Yomuyomuwawanawanaki i tanabwegabwegiya.” ³⁴ Eketa yana

* ^{37:25} Kisisiku nenesiyai bubu mamadisi si yuna maise kabwaga kana givimamadi fasisiyai be kasi gividiyaga. ^{37:28} Bunanige 7:9

† ^{37:28} Isimeni fasekwina o fafani Midiyani nenei.

nuwatadauna nenei kana nuya i kiganiniya, atu nuya yomuyomu utuutusiyai kikifufunisi[‡] i kotoniya keta kuyadayada yagwanina natuna i fokuwiiya.

³⁵ Natunatuna matatafusi, namōga be vivine, kana sawamwanumwanuva fasinei si niya eatu muka nuwanuwana. Eketa i iyavisiya i bwaduwa, “Ana bwediya kana nivaniva matematesi yasi kabaga kana ke’ta ana vaiya natuku nukusi.” Eyo natuna fasinei i viketotonii be i bwediya.

39

Fotifa Kawana Yosefa Si Kitanuvadiiya

¹ Tovanama Isimeni fasekwina Yosefa si niiya Itifita, Fotifa i vitamaniya kana kaetōga. Fotifa tanake o tuiyo kasi toviketanuneina. Tanake Itifita tu-fomu yana namōga tamo nakasina.

² Yave o Yosefa nukusi keta yana ovivita nenei, iba matatafunu i savivinisiya o dewadewana. Kana tovisime tene Itifita yana numai i fakwa.

³ Fotifa i kitanisaiya Yave o Yosefa nukusi eketa iba matatafusi i savisavivinisiya o si dibwadibwana-dewadewa. ⁴ Noko nenei nuwatana i oviya keta i viya tauna kana kaetōga. Eketa yana numa sinena kana kaetōga matatafusi sinesiyai, Yosefa i tene-viketanuniya. Yota yana nogonogo matatafunu kasi kitavikavina fasinei nimanei i teniya.

⁵ Noko tovanama nenei keta i niya Yosefa nenei eketa Fotifa yana numa kana tofakwa

[‡] **37:34** Nuya sakasakanununa kameni o gouti utuutusiyai si kikifufuna. Kaniga kana tovai, nofe i vivikiyakiyaya nuwatadauna.

kana dewadewana si nisaiya. Yana nogonogo matatafunu numa sinenei keta bagunai, Yave i sawanuwagabubuwiya eketa dewadewasi.⁶ Noko nenei eketa Fotifa yana nogonogo matatafunu kana visime fasinei o Yosefa nimanei i teniya. Keta muka tamo aviyavana fasinei ita nuwanuwa eatu yana kaaǵa fasinei o i kitavikaviniya.

Yosefa kana tufuwa dewadewana yota kotoki-waǵa.⁷ Muka ita fakwa nubwayouna eatu Fotifa kawana si kitanuvadiiya keta si sawanuyakaniya be nukusi sita banuwa.

⁸ Eatu i dibutoyoǵa i bwaduwa, “Kaku tovisime muka ita vinuwana aviyavana tamo numa nofe sinenei fasinei uǵuna iyau nenekuwai ketake. Nogonogo matatafunu o iyau sifukuwai.⁹ Iyau o numa nofe kana tovisime naki maise tanake, eketa muka tamo aviyavana ita sawatanai nenekuwai, eatu kwamiǵa kawana. Na uǵuna namaise ana fufunagoyo yo naki ana go'yona Guyau matanei?”¹⁰ Tova matatafunu si vivikokoniya atu i didibutoyoǵa keta muka nukusi sita banu yota muka nukusi sita fakwafakwa.

¹¹ Tova tamokaǵa Yosefa i kanasuna numai mudadava fasinei eatu tovanama nenei, muka tamo kaetoǵa numai ita fakwafakwa.¹² Eketa Fotifa kawana si niya Yosefa nenei keta kana kwame si gitoniya keta si sawanuyakaniya si bwaduwa, “Ku nemi ku banuveiki!” Eatu Yosefa i dibwana i kikinomana menanai atu kana kwame i venuteweiya gumayogu nimasiyi.

¹³ Tovanama si kitiya Yosefa naki i dibwana atu kana kwameǵa si givikaviniya,¹⁴ yasi numa kana kaetoǵa si wenevakukusisiya keta si iyavisiya

si bwaduwa, “Nofe kwa kitai! Namoḡa nofe tene Ibeniu kawaki i nemiiya kakaninama, i givisinemumuwita. I kanasunanemiya yama totomuwai keta nuwanuwana ita mataveikiya eatu ka fina. ¹⁵ Tovanama i nowaniya ka fina, i dibwana eatu kana kwame i venuteweiya niniukiyai.”

¹⁶ Eketa kwame si fakwiya kana nivaniva kawasi i makaviniya i nemiya numai. ¹⁷ Yota tamoka sifufunama si iyaviya si bwaduwa, “Kaetoḡa tene Ibeniu ku nemiiya kakaninama, i kanasuna yama totomuwai nuwanuwana ita givisinemumuwikiya. ¹⁸ Eatu tovanama ka fina nenei, kana kwame i venuteweiya niniukiyai atu i dibwana i kikinomana.”

¹⁹ Tovanama Fotifa kawana i nowanisiya si bwaduwa, “Ya kaetoḡa nofemaise i fufuna nenekiyai,” eketa sinena i nubusubusuwaniya. ²⁰ Tonuaviya i iyavisiya si tabiya keta deniyai si teniya. Kabainama o tufomu yana finisina fasisiyai.

Keta deninama sinenei o Yosefa i fakwa. ²¹ Eatu Yave tanake nukusi keta i nuwagabubuviya na nenei keta i sawanuwagabubuviya. Noko nenei keta deni kana tokitavikavina nuwatana i oviya. ²² Eketa finisina matatafusi keta mudadava matatafunu deni sinenei, Yosefa nimanei i teniya. ²³ Deni kana tokitavikavina muka ita nuwanuwa mudadavasima Yosefa nimanei i teniya fasinei. Uḡuna Yave o Yosefa nukusi keta i ovivitiya nenei iba matatafunu i saviviniyi o naki dewadewana.

40

Finisina Nasi Nuwa Si Kavayuna

¹ Tova tamokaġa Itifita tufomu kana ukowa kana tokavenena kasi toviketanuneina keta maneka kana tokaguwana kasi toviketanuneina nukusi, si fufunagoyowa tufomu nenei. ² Tobunanigesima nasi nuwa i nuwagoyowisiya, ³ keta deniyai i tenisiya tuiyo kasi toviketanuneina yana numai, namai Yosefa i fakwafakwa nenei. ⁴ Toviketanuneinanama Yosefa i teniya kasi kaetoġa keta si fakwa simo matanubwayouna.

⁵ Nuwabuna tamokaġa tufomu yana tobunanigesima, ukowa kana tokavenena keta maneka kana tokaguwana, si kavayuna. Nasi nuwa nuwabunana nama nenei si kavayuna atu kasi kavayunasima kasi gigivina o tuninatunina.

⁶ Tova i katakiya nuwabuniyai tovanama Yosefa i kitisiya tafakaisi si kanawenonowa. ⁷ Eketa i nutoniisiya i bwaduwa, “Kimoki namaise yo nuwanuwa i munumunumi?”

⁸ Si nufata si bwaduwa, “Nuwabuna nama nuwa ka kavayuna eatu muka tamo aitevana kana fata be kama kavayunasima ina kiyau.”

Eketa Yosefa i iyavisiya i bwaduwa, “Guyauġa kana fata kavayuna ina yausiya. Eyo kami kavayuna kwa iyaveiku.”

⁹ Eketa ukowa kana tokavenena i vibutuwa i nusifufuwa i bwaduwa, “A kavayuna a kitiya genefi unavina naukuwai, ¹⁰ eketa unavinama i vinaġġanaġħana naġġanina tonusi. Dadana si kikinomana, unavina si visisiya, si nuwatataisiya eketa uwasi si ouwa. ¹¹ Eatu tufomu kana owa o a gigivikaviniya, na fasinei uwa a kigonuwa, utosi a bībitotoiya tufomu kana owai keta nimanei a teniya.”

12 Eketa Yosefa i iyaviya i bwaduwa, “Ka kavayuna kana givinanofemaise. Nañani tonusi kana givina kuyadayada tonusi.
13 Kuyadayada tonusi ina kakavisiya muninei, tufomu debabougu ina katunakasiya eketa ina vinuwateweiwa eyo ina giyauwa keta ya mudadaya manatuwaina nenei ina tenesavaviniwa. Nokomai tufomu nimanei kana owa kuna vioviya, manatuwaina ku fufuniya maise tovanama ku vitokavenena ukowa kana tovai. **14** Tovanama kuta togadewadewa nenei, kuta tukukuwa. Ae unaku, kuta ovivitikuwa be tufomu kuta iyaviya fasikuwai ebe deni nofe sinenei kuta vikinomanikuwa. **15** Tufomu kuta iyaviya aviyavana nenekuwai i kikinomana fasinei. Ibeniu fwayafwayana nenei namoga si givikavinikuwa si dibwanikuwa. Nofemai yota muka tamo aviyavana goyona ata fufuniya atu deniyai si tenikuwa.”

16 Tovanama maneka kana tokaguwana i nowaniya unana kana kavayuna Yosefa i yauya fasinei, nuwatana i oviya eketa Yosefa i iyaviya i bwaduwa, “Iyau yota a kavayuna, maneka feyawisi tonusi a afisiya. **17** Feyawa etanemokenei sinenei o maneka tuninatunina kakaguwanisi tufomu fasinei. Eatu debaboukuwai feyawanama nenei o manuwa si kakawa.”

18 Eketa Yosefa i iyaviya i bwaduwa, “Ka kavayunanofemaise, feyawa tonusi kana givina kuyadayada tonusi. **19** Kuyadayada tonusi muninei, tufomu debabougu ina katunakasiya keta kayou sina nuonosiya eyo tofwau kai nenei sina sinavikukiya. Keta manuwa sina nemiya,

kwafiniweu viyou sina kaniya.”

²⁰ Kuyadayada tonusi i kakavisiya muninei, tufomu yana kafa tufuwa kana kuyadayada i nuvifotiya. Eketa yana kawakawa yasi ka i fufuniya. Ukowa kana tokavenena keta maneka kana tokaguwana i ketoyausiya keta si nemisiya tufomu nenei kawakawa nausiyai. ²¹ Nokomai, ukowa tokavenena i teniya kana kiviyai eketa tufomu nimanei kana owa i viova-savaviniya. ²² Eatu tonuaviya i visimeisiya keta maneka kana tokaguwana kayona si nuonosiya keta tofwana kaiyai si sinavukukiya. Naki avana Yosefa i bwaduwiya, maisemoka i kikinomana.

²³ Eatu ukowa kana tokavenena muka Yosefa ita tukuya, i vinuwataunuwiya.

41

Tufomu Kana Kavayuna

¹ Manamana nuwesi i kakavisiya muninei, Itifita tufomu i kavayuna vitana Naeni ukowa kafakainei i misimisiniya. ² Tovanama nenei bunumakau kasi 7 na kasi tufutufuwa yota kasi kita dewadewasi ukowi si vanenemiya keta nabenabe kafakainei, nimwau si kakawa. ³ Yota bunumakau kasi 7 kasi kita goyosi keta banibanimisi munisiyai si vanenemiya eketa niniusiyai si misiniya. ⁴ Kasi kita goyosi keta banibanimisi si misiniya keta kasi 7 na kasi tufutufuwa keta kasi kita dewadewasi, si kanisiya. Nokomai tufomu i kenoviniya.

⁵ Tovanama i banu-savaviniya, yota i kavayuna. I kitia witi uguna tamokaña nenei, i foka 7 wanosi nakanakasisi yota dewadewasi. ⁶ Muniyai yota

7 si foka o wanosi kasi kita vitana fonimana inainana ita taoyayanisi eyo sita wenono. ⁷ Wano wenonosi si misinimoka tu wano nakanakasisi keta dewadewasi, si tononisiya. Eketa tufomu i kenoviniya atu i sanamaniya o i kavayuna.

8 Nuwabuniyai kavayunasima fasisiyai, nuwanuwa yaona i vaniya. Na uđuna bwadu i vininitiya Itifita kana matatafu nenei yana toibaiba keta yana tonuwatasuyasuya fasisiyai, eketa si nemiya nenei. Kana kavayuna i nusifufuwisiya atu muka tamo aitevana kana fata be ita yausi nenei.

9 Atu tufomu kana ukowa kana tokavenena kasi toviketanuneina, tufomu i iyaviya i bwaduwa, “Ae aiye, kimoki yo yaku fufunagoyo a tukuya. ¹⁰⁻¹² Manatuwaina tovanama maneka kana tokaguwana kasi toviketanuneina keta iyau, ku nuwagoyowikiya eketa tuiyo kasi toviketanuneina yana numa sinenei, deniyai ku tenikiya. Tovanama nenei tene Ibeniu tufunakasina tamokađa waniya nokomai. Tanake o toviketanuneinanama kana kaetoga. Nuwabuna tamokađa nama nuwa ka kavayuna. Kama kavayunasima ka iyaviya eketa kasi givina i yausiya nenekiyai o tuninatunina. ¹³ Avana i bwaduwiya, naki maisemoka i kikinomana. Iyau ku tene-savavinikuwa yaku kafa mudadava nenei, eatu ya tonuaviya ku visimeisiya keta maneka kana tokaguwana kasi toviketanuneina kayona si nuonosiya eketa tofwana kai etanei si sinavikukiya.”

14 Eketa tufomu bwadu i vininitiya Yosefa fasinei eketa muka mwanenena atu deniyai si oviya. Nauna kana mutukonokono i tanakakanuya keta kana nuya i dawanamatamanina muniyai yo si niiya tufomu nenei.

15 Eketa tufomu i bwaduwa, “Nuwabuna a kavayuna, eatu muka tamo aitevana kana fata ita yauya nenekuwai. Atu a nowaniya avage tovanama avi kavayuna kuna nowaniya, ka fata kuna yauya.”

16 Atu Yosefa i bwaduwa, “Iyau muka kaku fata, eatu Guyauḡa kana kiyau dewadewana ina veniwa.”

Tufomu kana kavayuna nuwesi i nusifufuwiya Yosefa nenei.

25-32 Keta Yosefa na yana vimogumogu i bwaduwa, “Tufomu yo, ka kavayuna nuwesi kasi nuwanuwa naki tamokaḡa. Aviyavana tova kabegomokena Guyau ina saviviniya fasinei, neneweū i tene-kikinomaniya. Guyau naki i givifikiniya, iba nofe kabegomokena ina saviviniya. Nofe fasinei tamoka kavayunanaama atu kawa nuwa i visawaveniwa.

Bunumakau kasi 7 na kasi tufutufuwa yota kasi kita dewadewasi, maise yota witi fokasi 7 nakanakasisi keta dewadewasi, kasi nuwanuwa manamana 7 mauna. Itifita kana matatafu ina mauna.

Bunumakau 7 banibanimisi yota kasi kita goyosi munisiyai si vanenemiyia, yota witi fokasi 7 fisusi vitana fonimana inainana ita taoyayanisi keta sita wenono, kana nuwanuwa o manamana 7 nenesiyai noga. Manamana 7 mauna muninei,

manamana 7 yota sinesiyai nog a ina kikinomana. Eketa fiyao Itifita yasi mauna kana tova yawane sina vinuwataunuwiya, uğunafafani kana matatafu nog a ina munuya.

Tufomu yo, nofe avana a bwaduwisiya o naki maisemoka Guyau kabegomokena ina saviviniya.

³³ Tufomu yo, tamo namoğ a tosanamana atu na nuwatasuyasuyana kuta gibokiya be tanake Itifita kana matatafu ita visimeiya. ³⁴ Menana tamokatamokağ a nenesiyai kawakawa kuta vinuwadadanisiya. Ebe manamana 7 mauna yana tova nenei, tovanama kabwaga oyuna kasi tutuya nenesiyai, kawakawasima dawana 5 nenesiyai tamokağ a sita gigivikaviniya. ³⁵ Nofe kawakawasima maisa matatafun a sita kwakwiya. Ya visime nenei, menana tamokatamokağ a nenesiyai maisa matatafun a yasi bonuwai sita totoisiya ebe sita kitavikaviniya namoğ a fasisiyi. ³⁶ Nofe dawanasima yawane namoğ a ita vibiyawasisiya manamana 7 sinesiyai, tovanama nog a ina kikinomana Itifita sinenei. Ebe nofe ketaketanama nenei, namoğ a muka vitanona nenei sita domuna.”

³⁷ Tufomu yana namoğ a nakanakasisi nukusi ketaketanama nuwatasi i oviya. ³⁸ Eketa tufomu i iyavisiya i bwaduwa, “Venemokena, Guyau kanununa o namoğ a nofe nenei, yota muka tamo namoğ a tonuwatasuyasuya venemokena yo tana nisağai maise tanake.”

³⁹ Eyo tufomu Yosefa i iyaviya i bwaduwa, “Uğuna Guyau o ibasima nofe i gikikinomanisiya nenewe, eketa muka tamo aitevana yana sanamana be

yana nuwatasuyasuya maise kwaḡa. **40** Yaku kaфа visime matatafunā kwaḡa nimaweu eketa yaku namonamoḡa matatafusi, ya visimesima sina muniisiya. Eatū wavaḡa kana vifotu fasinei o kwaḡa sifukuwai.”

41 Eketa Yosefa nenei i bwaduwā, “Nofe tova kwaḡa a ginakasiwa Itifita kana matatafu kana tovisime.” **42** Eketa kana nimabweuna vivigionina,* nimanei i yauya keta Yosefa nimanei i sifwatamaniya yota kwame dewabauna i vikotoniyā keta kodokodo nukawanamanamanainana i viya keta kayonei i nuvisanigogwiya.

45 Eketa tufomu Itifita wavana Yosefa i veniya, Safeneti-faniya.† Yota kawana i veniya kana wava Aseneti, Fotifena natuna. Fotifena o Oni‡ yasi tovibwanaose. Eketa Yosefa naki i vitovisimeya Itifita nenei.

46 Yosefa i vibutuwa bunanige Itifita tufomu fasinei kana manamana 30 nenei. Noko muninei Yosefa i misiniya keta tufomu i venuteweiya eatu Itifita kana matatafu i vadadaniya. **47** Manamana 7 mauna yana tova sinesiyaifafani Itifita i maunafaga. **48** Noko manamanasima sinesiyai, Yosefa namoḡa i iyavisiya ebe kabwaga si ooyuna atu tufotufo si vakukusiya keta menaninama

41:40 Bunanige 7:10 **41:42** Daniyena 5:29 * **41:42** Visime kana kiyakiyaya yota na kana kaфа kita vitana Yosefa i savisavivina tufomu yana visime nenei keta fonanei. † **41:45** Ibeniu fonasiyai, Safeneti-faniya kana givina maise guyau i nunusifufuwa keta guyau fakwafakwana. ‡ **41:45** Oni kana wava kana vinuwa Eniyofonisi. Menaninama nenei namoḡa vanavana nenei si kodukoduwa.

tamokatamokaḡa kana bonuwai i totoiya.
 49 Dawana i kisiwaḡa si vimwanauguna maise numagama kwadewai, eketa kana ginaḡanāga Yosefa i onoviya.

⁵³ Manamana 7 sinesiyai Itifita sinenei, mauna kana tova i kakaviya. ⁵⁴ Eatu manamana 7 noga i vibutuwa, naki avana Yosefa i bwaduwiya maisemoka i kikinomana. Fafani matatafunu nenesiyai o noga nakasina i kikinomana, eatu Itifita yana kafa visimeḡa nenei o kabwaga i fakwafakwa. ⁵⁵ Tovanama fiyao Itifita si vitanonamoka, si vikokona-bwedibwediya tufomu nenei kabwaga fasinei. Eatu tufomu i iyavisiya i bwaduwa, “Yosefa nenei kwa nai be avana ita iyavimiya maise, kwa savivinei.”

⁵⁶ Fwayafwaya kana matatafu noga nakasina atu Itifita nenei o nakatamokena. Eketa Yosefa kabwaga kasi bonu i kiyauwa eketa fiyao Itifita nenesiyai i vikimwaneina. ⁵⁷ Atu yota manifafani nenesiyai noga i nakatamoka. Na fasinei namoḡa si nenemiya Itifita eketa Yosefa nenei kabwaga si vivikimwaneyea.

42

Yakobo Natunatuna I Visimeisiya Si Niya Itifita

¹ Eatu tovanama Yakobo i nowaniya vitana Itifita nenei kabwaga, natunatuna nenesiyai i bwaduwa, “Namaise yo kwa nigwanavaḡata. ² Kwa vanenēga! A nowaniya vitana Itifita nenei kabwaga. Kwa sobu nokomai kwa vikimwane akata tana domuna.”

³ Eketa Yosefa sisitawaġana kasi 10 si sobuwa Itifita kabwagavikimwane fasinei. ⁴ Atu amasi i vinuwana vitana tamo avana goyona ita kikinomana Beniyamina, Yosefa kana tufunuwa nenei. Na fasinei muka ita visimeyei ebe nukusi sita nai nenei. ⁵ Fafani Kenani nenei noga naki i goyomoka, na fasinei Yakobo natunatuna yota namoġa yagwanisi nukusi si sobuwa Itifita kabwagavikimwane fasinei.

⁶ Noko tovanama nenei fafani matatafunu Itifita sinenei Yosefa i vivisimeiya, eketa namoġa matata-fusi nenesiyai kabwaga i vivikimwaneiya. Eketa tovanama sisitawaġana si kikinomana, kaevavanei si koduwa fwayafwayai. ⁷ Yosefa i kitakinanisiya eatu seba i teweiya vitana muka ita sanamaneisi eketa i kayosanakiya nenesiyai i bwaduwa, “Kwami namaniyei kwa nemai?”

Eketa si bwaduwa, “Kima Kenaniyei ka nemiya kabwagavikimwane yawagiki.”

⁸ Yosefa sisitawaġana i kinanisiya atu tasike o muka sita kitakinanei. ⁹ Kana kavayuna i tukunakasiya fasisiyai eketa i bwaduwa, “Kwami tokitanaġanaġa kwa nemiya kwana sanamaniya kawasasa kafa kanasuna ebe yo nemaniyei kwana vibutukiya.”

¹⁰ Atu si nufata si bwaduwa, “Aiye, muka. Kima ka kaetoġa ka nemiya o kabwagavikimwane yawagiki.”

²¹ Eketa tututausi nenesiyai si vikanusifusifufuwa si bwaduwa, “Noko tovanama nenei taita i bwedisitasita kana ovivita fasinei kana dauna

ta kitiya eatu muka tata sineganiganiyei. Na fasinei nofe dauninama ta kakamukoniya o kita kata kuvana.”

²² Eketa Nubeni i bwaduviyewa i bwaduwa, “Noko tovanama nenei a iyavimiya, ‘Muka gwadimonamona kwana givikuavaniya.’ Eatu fonaku kwa teweiya. Nofe tova yana mate fasinei kita mwavinana ta ninisaiya.” ²³ Yosefa o Itifita fonasiyai i nunusifufuwisiya keta togivina i gigiviniya nenesiyai. Na nenei si bwaduwa vitana muka yasi sifufu ita nowanowaniya.

Yosefa nenei sisitawağana kabwaga si vikimwaneya eketa si makavinisiya Kenani amasi nenei. Muniyai yota si makavina-savavinisiya Itifita kabwagavikimwane fasinei.

45

Yosefa Tauna Wakakana I Siiya

⁴ Yosefa Ibeniu fonasiyai sisitawağana i iyavisiya i bwaduwa, “Simokağa kwa nemai niniukuwai.” Eketa si nemiya niniunei, eyo i bwaduwa, “Iyau taimi Yosefa. Gwadikuma kwa vikimwaneikuwa Itifita nenesiyai. ⁵ Noko fasinei muka nuwatami ina dauna be tututaumi kwana vikanuwanuwagoyo, kwa vikimwaneikuwa be a nemiya nofemai fasinei. Atu tanake Guyau i mikiteweikuwa a nemiya namoğa kasi gifafafana fasinei. ⁶ Noga i nemiita manamana nuwesi. Eatu yota manamana 5 si nenemoya nenesiyai, muka tamo aitevana kana fata ina baguna o ina nukabwaga. ⁷ Guyau i mikiteweikuwa kunaumi ebe yawasimi ata gifafafanisiya ketaketa

dewabauna nenei, ebe susukwa kiyakiyayana muka ina domuna fwayafwaya nofe nenei.⁸ Nofe fasinei kwami muka kwata teweeyeiku be ata nemi nofemai, eatu tanake Guyau i teweikuwa. Eketa i tenikuwa togivisawakedana tufomu fasinei, yota yana namonamōga yasi tuveka keta yota Itifita kana tovisime.

⁹ Nofe tova kwana dibwana amaku nenei eketa kwana iyaviya, ‘Natuu Yosefa maise i bwaduwa, “Guyau i tenikuwa Itifita kana tovisime nakasina. Eketa muka kuna tuyawayawanei nenenkuwai.¹⁰ Na uguniu kwata vikukuwayauna, be yami yomuyomu be wāgawāgau nukusi kwata nemiya fwayafwaya Goseni nenei, niniukuwai kwata vimenana.¹¹ Ebe yo manamana 5 nenesiyai yawane nogá ina niniya, ana kitikitimiya. Akata ka sabu nukusi vitanona nenei kwana fakwa.” ’ ”

²⁵ Yosefa sisitawāgana Itifita si teweiya atu si makavinisiya Kenani amasi Yakobo nenei.²⁶ Eketa amasi si iyaviya si bwaduwa, “Yosefa noko i fakwafakwa, muka ita mate atu tanake Itifita kana tovisime.” Eatu Yakobo si visabanutuiya eketa muka ita vitumāganeisi.

²⁷ Atu matatafunavana Yosefa i bwaduwuya maise si iyaviya. Keta yota Yosefa waganusoni* i teweisiya kana kivitotōga fasinei, tovanama i kitisiya nuwatana i kanabunabuya.²⁸ Eketa i bwaduwa, “O bwadu venemokena. Natuku Yosefa gewa i fakwafakwa. Kwa niyeiku be natuku

45:9 Bunanige 7:14 * **45:27** Waganusoni o yomuyomu munisiyi si sisinavifotiya eketa si sonisonidadaniya.

tafakaina a kitai, fonana a nowaniya, yo muniyai kwana teneviunikuwa.”

46

Yakobo Ugunina Nukusi Si Niya Itifita

¹ Eketa Yakobo, yota kana wava kana vinuwa Isineni, ugunina nukusi si vikukuwayauna Itifita fasinei. Eketa tovanama si nemiya Biyasiba, yomuyomu i vibwanaoseisiya amana Aisake yana Guyau nenei. ² Na nuwabunananama nenei Guyau kenokitai i iyaviya i bwaduwa, “Yakobo! Yakobo!”

Eketa i vinowaniya, “Iyau weka.”

³ Eketa Guyau i bwaduwa, “Iyau Guyau, amau yana Guyau. Muka kuna matuta ku niniya Itifita fasinei, uğuna noko menaninama nenei susukwau ana givinakasiya. ⁴ Iyau nukusi tana sobuwa Itifita eatu yawane yota susukwau nukusi ana makavinimiya nofemai. Eatu kwağā o natuu Yosefa nimanei kuna vidawana.”

⁵ Eketa waganusonisima tufomu i vininitisiya nenesiyai Yakobo natunatuna si totoiya yota kakawasi keta natunatusi, eketa menana Biyasiba si teweiya. ⁶⁻⁷ Yota yasi yomuyomu be kukuwa matatafunu Kenani nenei kasi fwasimowai i kikinomana, nukusi si niisiya Itifita. Yakobo i misiniya natunatuna namoğā be vivine keta yota wağawağana nukusi.

Yakobo Ugunina Nukusi Si Kikinomana Itifita

²⁸ Yakobo Yuda i visimeiya i venuviketanuna Yosefa ina matakawiya vitanafafani Goseni nenei sina vikaninisäga. Tovanama si kikinomana

nokomai,²⁹ Yosefa yana aviya kana waganusoni si gidewadewiya keta i niya Goseni, amana i venufotefotiya. Tovanama amana i kitiya, i nusiya keta i bwediiya matanubwayouna.³⁰ Keta Yakobo Yosefa i iyaviya i bwaduwa, “Kimoki gewa naki tauku matakawai tafakaiu a kitiya na yawasiu, eyo muniyai kana nufota ina kakavikuwa.”

48

Ifeneimu Keta Manasa Kasi Sawanuwagabubu

¹ Tamoka tova Yosefa i biganowana amana i visafwavināga. Eketa natunatuna kasi nuwa Manasa keta Ifeneimu i ovisiya keta si niya Yakobo kana kita fasinei.

² Tovanama Yosefa i kikinomana, Yakobo si iyaviya si bwaduwa, “Natuu Yosefa i nemiya.” Eketa Yakobo matamataveyai atu naki i fiwanemokya keta i nuvitoiya kana kiviyai.

³ Keta Yakobo Yosefa i iyaviya i bwaduwa, “Fafani Kenani menana Nusi nenei Guyau Tofiwanaonaona i kenokikinomana nenekuwai keta nokomai i sawanuwagabubuwikuwa.⁴ I bwaduwa, ‘Kimoki ka sabu ana givinakasiya. Susukwau ana givigeyaniya ebe kunuma yagwanina ina kikinomana. Yota fwayafwaya nofe ana venisiya susukwau yasi fwayafwayavağata.’ ”

⁵ Yakobo yana bwadu i nusaviya i bwaduwa, “Eketa natunatuu kasi nuwa Ifeneimu keta Manasa Itifita si tufuwa yo muniyai a nemiya o iyau natunatuku, naki maisemoka Nubeni keta Simiyoni.⁶ Eatu muniyai natunatuu sina tufuwa, enao kwāga natunatuu. Eatu yasi fwayafwaya

kana vitoniwaga fasinei o sisitawaġasi Ifeneimu keta Manasa kasi wavai.”

¹³ Eketa Yosefa natunatuna kasi nuwa i niisiya Yakobo niniunei. Ifeneimu i teniya Yakobo kukikimawana, atu Manasa o kukikikataina. ¹⁴ Eatu Yakobo nimana i tewewenuya keta kikikataina gwadiyei Ifeneimu debabounei i teniya atu kikimawana o i teniya kotokikinuna Manasa nenei. ¹⁵ Eketa Yosefa i sawanuwagabubuwiya i bwaduwa,

“Guyaunama amaku Aisake keta waġaku Ebenaamu nenei si kodukoduwa,
tufunakata nofe ita sawanuwagabubuwiya.

Guyaunama yawasiku kana matatafu nenei i kitavikavinikuwa maise yomuyomu kasi tokitavikavina,
ita sawanuwagabubuwiya.

¹⁶ Yota Guyau kana kaetoġanama abamei i ofafafikuwa dauna matatafunu nenesiyai,
ita sawanuwagabubuwiya.

A kawakawanunukuwiya be nofe tufunakatasima nenesiyai,
namoġa kaku wava, amaku Aisake keta yota waġaku Ebenaamu kasi wava,
sita tukutukusiya.

Keta yota a kawakawanunukuwiya
be kasi sabu ita nakata fwayafwaya nofe nenei.”

¹⁷ Eatu tovanama Yosefa i kitija amana

kikikataina* i teniya Ifeneimu debabounei muka ita sebobo. Na fasinei amana nimanei i ova be ita tenetamaniya Manasa debabounei. ¹⁸ Eketa i bwaduwa, “Amaku, na muka nemaise. Manasa o kotokikinuna. Na fasinei kikikataiu debabounei ku tenei.”

¹⁹ Eatu amana i vikununewanewa i bwaduwa, “Natuku, a sanamaniya avana a savisaviviniya. Kimoki Manasa kana wava ina nakata. Susukwanei yawane kunuma nakasina ina kikinomana. Atu taina o yawane nakatamataina yo tawağana. Eketa susukwanei yawane kunuma yagwanisi sina kikinomana.” ²⁰ Eketa na kuyadayadanama nenei i sawanuwagabubuwisiya i bwaduwa,

“Avi tova fiyao Isineni yasi sawanuwagabubu kana tovai, kami wava sina kinana sina bwaduwa,

‘Guyau ka kawakawanunukuwiya be ita sawanuwagabubuwisa vitana Ifeneimu keta Manasa i sawanuwagabubuwisiya maise.’ ”

Noko nenei Ifeneimu kana wava i teneviketanuniya eatu Manasa i vimunifota.

²¹ Eketa Yakobo Yosefa i iyaviya i bwaduwa, “Ku nowaniya, iyau o kabegomokena be ina kakavikuwa, eatu Guyau o kwami nukusi. Eketa yawane ina makavinimiya wağawağami fwayafwayasiyai.”

* **48:17** Fiyao Isineni si sanamaniya kikikatai nima kana sawanuwagabubu nakatamataina yo kikimawa. Na fasinei keta tovanama Yakobo kikikataina gwadiyei nenei i teniya, Yosefa i sabanutuiya. **48:20** Ibeniu 11:21

49

Yakobo natunatuna i wenevakukusisiya eketa kasi sawanuwagabubu nenei, i iyavisiya ibasima yawane sina kikinomana nenesiyai. Eketa Yuda nenei o nofemaise i bwaduwa.

Yakobo Yuda I Sawanuwagabubuviya

- 8 “Yuda, unaunau sina daviwa
keta sina koduwa neneweu.
Ka aviya kuna gikayusiya keta kuna vatanisiya.
- 9 O Yuda, kwaǵa maise naiyoni mwanavauna,
kimoki mani yomuyomu kuna fiwanateweisija
keta kuna visimeisiya.
- Naki naiyoni maise, tovanama
ina gevagevamunuwa muninei yo
ina makaviniya ina ketosebaǵa,
atu aitevana simo fatafatana yo
ina vikasanegwanegwai?
Naki mukamokena!
- 10 Tufomu yana visime kana kiwana Yuda ni-
manei ina fakwa
keta susukwana o tova kana matatafu
sina vivitovisimaya
kana nivaniva tonikiwana ina nemiya.
Nokomai kunuma matatafusi
sina vimogumoguwiya.”

33 Tovanama Yakobo natunatuna nenesiyai
i nusifufukoǵa, i sioviniya keta i kenofana.
Tovanama nenei yawasina i tununoviya keta
i vidawana.

Yakobo Itifita i fakwa manamana 17, eketa manamana kana vikatutamokeina na yawasina i fakwa o 147.

50

Yosefa Sisitawaġana I Sawavininiusiya

15 Yosefa sisitawaġana si sanamaniya amasi yawasina i kakaviya eketa tututausi si vikanusifusifufuwa si bwaduwa, “Namai tu Yosefa yata fufunagoyo manatuwaina ina tukunakasiya yo ina kwabuyuna.” 16 Eketa sifufu si vininitiya Yosefa nenei si bwaduwa, “Muniyai yo amata yawasina ina kakaviya, i bwaduwa, 17 “Yosefa nofemaise kwana iyaviya. “Sisitawaġau yasi fufunagoyo neneweū, nuwanuwaku kuna vinuwateweiya.”, Kima o amau yana Guyau kana kaetoġa na fasinei ka vikokona-sineganiganija neneweū ebe yama go'yona kuta vinuwateweisija.” Tovanama Yosefa bwadu nofe i nowaniya, i bwedisitasita.

18 Eketa sisitawaġana si nemija naunei si fekuwa keta si bwaduwa, “Kima ka kaetoġa.”

19 Eatū i iyavisiya i bwaduwa, “Muka kwana matuta, iyau muka Guyau. 20 Manatuwaina kwata givikuvavanikuwa eatū Guyau i gikikinomaniya kana dewadewana ebe namoġa yagwanisi muka sina domuna, maise kimoki ta kitakitiya. 21 Na fasinei muka kwana matuta, na natunatumi ana kitavikavinimiya.” Nofemaise fonana biganei i sawavininiusiya.

**Buk Baibel long Kaninuwa
Portions of the Holy Bible in the Kaninuwa language of
Papua New Guinea
Buk Baibel long tokples Kaninuwa long Niugini**

copyright © 2016 Wycliffe Bible Translators, Inc.

Language: Kaninuwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-13

PDF generated using Haiola and XeLaTeX on 11 Nov 2022 from source files
dated 9 Oct 2020

4bd5ff25-b536-53c8-9426-bc0ecd08c86d